


DIMIINU DYÀ NYÒKA

 Nzambi munanga, Nzambi munene ne wa bukole, Wâkenza bintu byônsò ku bukole bwa Nyuma Wende, ne wâkatwàla Yesu Kilisto, Mwan'Ende umwepele mulela, Wâkafwà ku budiswilè Bwèndè bwetu twètù bangènzàmpèkààtù, Mwakane bwa babi, bwa kutupungisha ne kutwaluja mu dyumvwangana dya dikema ditukaadi naadi cyakabidi ne Nzambi edi, mutudi bayiile mu Dîyi dibenesha ne, tuvwa Nende mu dyumvwangana kumpala kwa difùkà dya dyulu ne buloba: “Pavwa mitooto ya mu dinda yimba pamwe, ne bâna baa balume baa Nzambi beela mbila ya disanka, kumpala menemene kwa difùkà dya dyulu ne buloba kwaka.” Mmunyi mutudi bamanye ne kacivwa cikondo cimwecimwe aci cyàkashipiibwà Mwânà wa mukooko; pavwa Nzambi, mu meeji Ende manene, mutumone twela mbila ne tusanka mu disungidiibwa dyetu mu Yesu?

² Nénku, diloolo edi, tudi bapete anu kààdyosha kaa butumbi bunene bwa Nzambi abu bwâbuuludiibwà ku Dilwa Dyende dya cyakabidi. Mâsaamà ônsò ne tunyinganyinga twônsò nebyumushiibwe. Dîbà adi netwikale ne mubidi mufwanangane ne mubidi Wende Yéyè mwine wa butumbi, bwalu netuMumone bu mudiYe. Panwapa patudi tutangila tumona mudi byanza byetu byenda bifubidila, nsuki yetu yenda yandamuka mvyà, ne makaaya enda akobama, tudi bamanye ne tudi baa cifwaka ne tuya batangile ku lupwishi kudi mitu yetu miikàle miinyika mpindyewu eku, ne kutudi bafumine. Kadi, Mukalenge Nzambi, anu mudibi bushuwa ne Wèwè udi Nzambi, Wèwè ki wâkenza mulayi wa ne netubiishiibwe cyakabidi ku lufu mu matuku a ndekeelu, nenku ki citudi twitabuuja.

³ Kakuyi tuseku to tudi biimane ne diitabuuja dyetu diloolo edi mu Bwikadi Bwebe, biikàle tulwa ne dikima bwalu Yesu wakatutumina dîyi bwa twètù kulwa nanku. Katuyi beeyemene cintu cîmpè kampanda citudi twètù benze to, bwalu katwena ne citudi benze cya cîmpè to; kadi tudi tulwa ne didipwekesha dyônsò, biikàle tujikula ne tudi ne bubanji ebu bwa ngâsà Wende udibo batwâbanyine. Ki bwa cinyi, tudi tulwa biikàle tulomba bwa Wèwè kutubenesha diloolo edi mu ditwala dya Dîyi. Bwalu mbifundiibwe, ne: “Muntu kaakwikala ne mwoyi ku dyâmpà nkaayadi to, kadi ku Dîyi dyônsò didi dipatuka mukana mwa Nzambi.” Nénku enzaaku bwa mukana mwa Nzambi mwakule diloolo edi. Enzaaku bwa mèyi apatuke, ne Dyôdi diye mu ndondo wa myoyi yetu, twètù bateeleji, ne yikale myûle tente ne Nyuma Webe ne Bwikadi Bwebe. Bwalu tudi tulomba nunku mu Dinà dya Yesu. Amen.

⁴ Lee—leelu ne makeelela, makeelela diloolo's we, eyowa, ne leelu, tudi baakule pa cyena-bwalu, dyambedi, kumutù

kwa byònsò ne: *Bwà Cinyi Twètù Katwèna Dìngumba*. Ne tudi bacyùmishè, bwa cinyi katwena dìngumba, ne bwa cinyi katwena twitabuuja mangumba. Bwalu, tudi tusangana mu Bible ne, mangumba kâtu mateekiibwe kudi Nzambi to; atu mateekiibwe kudi dyabulu; ne twacijaadiki ne Bible. Ne mushindu udibi ne, kupicila ku mangumba, mbitwale ntupakanyi. Nenku tudi twamba maalu aa mbwa kulongolola ne kufikisha tabernacle ewu mu bwobumwe ku nyungulukilu wa Dìyì dibenesha dya Nzambi. Bwalu, bitudi tutekemena kî mbiibakila pa bidi dìngumba dyamba, anyi bidi muntu kana yònsò ewu wamba to; mbiibakila pa bidi Mukalenge Nzambi mwambe. Nenku ki mushindu umwepele utudi mwa kulongolodiibwa bîmpè.

⁵ Nenku mu dinda emu, mvwa ne maalu ataanu, ngela meeji, tunungu tushiileshiilangane tudi tupatukile mu dìngumba, tudi mu bushuwa bwa bwalu tudibo kabayiku bambe mu Bible to, tudi ekeleeziya ya Mishònyì yitumikila, miikale yitulongesha bu ne ki dilongesha dya nshindameenu: cintu cimwecimwe cidi maamà ndumba wa kale, ekeleeziya wa Katolike uyiisha aci, kadi ncipatuke e kubwela mu ekeleeziya wa Mishònyì. Kadi nyewu tutumikila ku cintu cimwecimwe aci cidi cibènganganà ne byònsò bidi myaba yònsò mu Bible abi.

⁶ Ekeleeziya wa cyena mangumba wa kumpala, tudi bakebulule mu mapingaja emu mu maalu malonda a baataatù baa Nicée, baa ekeleeziya wa Nicée. Ku lufu lwa bapostolo, ki kwàkalwà baataatù baa Nicée, ne kutungunukabo bidimu mulongolongo. Bidimu nkama yisatu ne makumi abidi ne bitaanu, ki ndekeelu wa byònsò kukafikabi ku—ku Nicée, France, kwakenzelabo mwine nsangilu mu—munene wa Nicée awu. Nenku mwômò amu ki mwakafwimbilabo mêtì maswika adi naawu ekeleeziya wa Katolike mpindyewu aa, ne ki bidibo basambulujile kabidi beena Mishònyì.

⁷ Nenku anu mûndì mwambe mu—mu dilongesha dya mu dinda emu ne: “Cyònsò cya ku bikondo bya ekeleeziya abi, too ne ku—too ne ku cikondo cya ekeleeziya wa Tesalonika aci, bidimu cinunu ne nkama yitaanu bya bikondo bya mîdimà, kakuvwaku musangu nansha umwe uvwaYe kayi mwambe ne: ‘Ucidi ne Dînà Dyanyi’” to.

⁸ Nenku ku luseke lukwabo eku, kabacivwa kabidi mu Kilisto to, baakapatuka biikàle ne dînà dya cyena mangumba ne: “Katolike, Luther, Wesley, Baptiste, Presbytérien, Mpenta,” anu nanku.

⁹ Kadi anu pabwîpì menemene ne ndekeelu wa cikondo aci, Yèyè kwamba ne: “Ndi muteeke kumpala kwebe ciibi cyunzulula.” Nwamonu anyi? Nenku ki cikondo citudi twela meeji ne ki citudi twètù mpindyewu eci, cikondo cya ciibi

cyunzulula, pankaci paa dipatuka dya ndekeelu dya ekeleeziya wa Laodikiya.

¹⁰ Nenuki bidi anu menemene bidimu nkama yisatu ne makumi abidi ne bitaanu too ne ku nsangilu wa Laodikiya. Nenuki mwômò amu ki mwakiitababo bintu bya kwísùkwísù ebi bu mudi dimyaminangana dya mâyi, dipongolwelangana dya mâyi, ne mabatiiza a mashimi, nyuma mwîmpè wa mashimi, bintu bikwabo byònsò ebi. Bôbò kubiitaba.

¹¹ Ne pashiishe Luther, bu muvwaye nsaserdose, paakatukaye mu ekeleeziya wa Katolike, wakalwa ne bintu ebi mu dipatuka amu. Ki kupatukamu Zwingli, mu Zwingli kupatukamu Calvin, mu Calvin kupatukamu Wesley, kaa, anu nanku. Nenuki badi anu batungunuke ne kusambulujilangana twitabaayi ayi. Nenuki mmunyi mudi Nzambi mwa kulombola Ekeleeziya Wende, padibo benda balonda njila yituYe kayiku mwanji kufila bwa bôbò kulombodiibwamu?

¹² Nenuki nwavulukaayi ne, mu Bwakabuulwibwa 17, tudi basangane “mukaji” awu. Mpindyewu myaku eyi mmyamba patooke. Mmifunda mu Bible, pa nanku ndi ngeela meeji ne ndi mwa kuyamba. Mbambe ne mukaji ewu uvwa “mukaji wa masandi.” Mbwena kwamba ne uvwa mmukaji wa luumu lubi; bwalu uvwa ne mmusediibwe kudi mulume kampanda, kadi mwende masandi ne baa pa buloba. Ne yêyè uvwa ne... Uvwa “MAMWÈNDÈ WA BANDUMBA,” mbwena kwamba ne uvwa ne bânà baa bakaji. Nenuki tudi bazole cintu aci bilondeshile mudi maalu a buloba, mwikàle mu... Nenuki mwômò amu, mêmè mwine, ncimona mu Mifundu, mmona malongesha ende ne bikwabo byònsò, ndi ngiitabuuja ne Mukalenge mmuciteeke anu mu njila menemene, mu mushindu wa ne kacyena mwa kwikala cîngà cintu to anu ekeleeziya wa Katolike. Ki mushindu umwepele udici mwa kwikala. Nenuki yêyè awu mmulele cinyi? Ekeleeziya ya Mishòonyi. Menemene, yêyè ngudi muyilele.

¹³ Nenuki uvwa mu cyanza cyende ne dikopo dya mvinyo wa masandi ende, mwikàle umupa bamfumu baa pa buloba. Ne yêyè nguvwa mukookeshi pa buloba bujima, mu ngaakwilu wa mu nyuma. Nenuki aci ncyà bushuwa menemene. Kakwena mukwabo...

¹⁴ Tangilaayi, twêtù, tudi bafwanyine kwalukila mu Danye ne kwangata lupingu alu. Tangilaayi lupingu alu: mutù wa ngòlò, bukalenge bwa Baabulona; cyamu cya kabanda... anyi cya argent, Meedàayi ne Peelààsà; cyamu cya kabanda, Alexandre le Grand, ne bikwabo, bukalenge bwa beena Ngelika; pashiishe makalenge maalabale a beena Loomo, Loomo wa ku Esete ne wa ku Wesete, makàsà abidi awu.

¹⁵ Nenuki monaayi mu makalenge dikumi aa, àdì àlwa menemene ne nsengu dikumi yituvwa twamba mu dinda edi ayi awu, mu bwònsò bwa ku makalenge dikumi àvwà ne cya

kujuuka awu, muvwa cyamu cifiike ne diima bisambakaja. Ne cyamu cifiike aci civwa cifumina ku mikolo, civwà ciikàle Loomo. Nenku kudi kashoonyi kaa cyena Loomo kiikàle kasambakaja mu ditunga ne ditunga dyònsò didi mwinshi mwa Dyulu, kupicila ku ekeleeziya wa Katolike. Aci ncyà bushuwa menemene. Nenku kî mbifwanyine kusambakanaku to, nansha mwaba kaayi.

¹⁶ Nenku bavwa mwa kwenza dibaka disopakaja, ewu ne ewu. Bible ngudi mwambe ne nebènzè nanku. Kadi batangilaayi leelu ewu. Mwaneebe wa balume useeselangana ne mwànà wa bakaji mwena Katolike; padibo baya kaselangana, bikengela balayangane bwa kukoleshabo bânà baabo abu biikàle beena Katolike; nwamonu's, anyi mwaneebe wa bakaji bàmusèla kùdi mwena Katolike. Nwamonu's, mbwa kucibula bukole bwa mukwabo.

¹⁷ Kadi ncinyi ciine aci? Bible udi wamba ne cintu cyònsò mu kaabujima nndumba. Mpindyewu cinwenza ncinyi? Ncyà bushuwa. Ne mushindu wikalà mpekaatu ya bantu ne cya kunyookiibwa...Tuvwa baalukile mu Dutelonoma, twètù kulejea ne mwànà mulela mu masandi, mwànà wa panshi, kavwaku nansha mwa kubwela mu disangisha dya Mukalenge to munda mwa nkongo dikumi ne yinaayi. Aci civwa mmu mikenji. Ki Kilisto kulwa kukolesha mikenji ayi. Mbikolesha kabidi kupita apu mushindu kaayi mpindyewu?

¹⁸ Nenku ncinyi cidi cyènzekelà bôbò aba, mbwalu kaayi ne tukaji twa mvwadilu mubi twa mu mùsèèsù etu leelu wa Ndaaya ewu, tukaji tunù twa mfwanka etu, ne tuvwadi twa tuputulu, tukaji twa mvwadilu mubi twa nsuki mibebula etu, ne bikwabo? Ncilumbu kaayi eci ne cyôci aci? S'mbwalu mamwâbò uvwa wenza nanku. Ndiyooka, bubi, busambuluja ku lukongo ne ku lukwabo. Ki mudi bwalu nanku. Kadi citudi bapete ncinyi? Tukaadi bafike pa mwaba wa ne, cikaadi kaciciyi cingà cintu to anu mushiki wa mpekaatu ya bukooya myambakaja.

¹⁹ Ki bwa cinyi Nzambi mmujuule Russie, kwaka naka, ne bombe bwa mushinda bwa kumukupula kashidi, anu muvwa mvula wa Noa mwenzeke amu, paakajuulaYe mavuba. Ncyà bushuwa, ncidiYe mwenze. Ne Bible udi wamba nanku. Russie, ditunga dya badi babenga kwitaba diikalaku dya Nzambi adi, babenga kwitaba diikalaku dya Nzambi, kakuyi mpatà to mmwenze mudimu wende anu menemene mu byanza bya Nzambi wa Bukole bwònsò. Anu mwakadibi ne Mfumu Nebukandeneesa uvwa ne cya kubutula Izaleela bwalu baakapanga kwenda ne Nzambi, Russie udi munkaci mwa kujuuka bwa "kusombwela bansantu," kudi ekeleeziya wa Katolike, bwa mashi a bansantu akeelaye panshi awu. S'ki cidi Bible mwambe. Yèyè neangate cintu cyònsò nkòong.

²⁰ Nenku tangilaayi kuneeku, piikalabi ne mamwábò uvwa nsongaakaji muji wa maja, ne kakwábò mukaji, ne mamwèndé mwikàle mukaji wa mvwadilu mubi, yèyè udi cinyi leelu ewu? Muji wa maja a rock'n'roll uvuula ne bilàmbà's. Bende bânà nebiikale cinyi?

Nenku wèwè udi wamba ne: "Nzambi udi wenza nanku anyi?" Eyowa's, mukalenge.

²¹ Nzambi udi unyooka bubi bwa bânà, lukongo, too ne ku nkongo dikumi ne yinaayi. Piikalà Kilisto mulwe kucikolesha, twètu's tudi bafwanyine kwamba ne: "Nkongo lukama, anyi nkongo nkama yitaanu." Mona's, Yèyè mmwambe ne: "Baa kale abu, nutu bumvwe baakamba, bôbò baa kalekale abu ne: 'Kushipyanganyi.' Mémè ndi ngamba ne: 'Wèwè, ewu wadidinga anu kufiikila mwanaabo munda, kapayi bwalu to, mmumane kushipangana.' Nutu bumvwe bamba, bôbò baa kalekale abu ne: 'Kwendi masandi.' Kadi Mémè ndi ngamba ne muntu yèyè mutangile mukaji bwa kumwalakana, wamanyi kwenda masandi." Yèyè wakacivwija... *Kukolesha* mbwena kwamba cinyi? "Kucivwija cinènè misangu yàbùngi." Nenku piikalabi ne mu mikenji civwa nkongo dikumi, cintu cimwecimwe aci necyangate cikondo bule kaayi leelu wa Ndaaya ewu?

²² Nenku nsongaalume, ne bantu balume baa bashindame, ne balume bàkaadi baselangane kabeena ne kaneemu kààbùngi bwa malaya abo a dibaka to. Mona's, badi bangata anu bakaji benda naabo masandi myaba yònsò cyanaana, anu mudi mbwa yònsò cyanaana eyi. Mbwa udi ne kaneemu kimpè ne nsòmbelu mwîmpè kupita bamwe bantu. Cibì ndi mumanye ne aci neikole cipange ne mwa kukola, kadi ncyà bushuwa.

²³ Bwa cinyi? Kadi ekeleeziya miine paayi yidi yenda yiya anu kumpala kayiyi yambapu bwalu nansha bumwe to. Bwa cinyi? Yidi yenza maalu anu mudi mamwábò wenza. Ekeleeziya yidi yicipyana's. Bwalu, ekeleeziya ne ekeleeziya wa Mishònyì ewu mmupatukile mu ekeleeziya wa Katolike, mpekaatu ya ekeleeziya wa Katolike badi bayinyookela pa beena Mishònyì. Ncyà bushuwa, pa nanku lwesu lwa mishila kalwenaku mwa kwamba mbidika wa diipikila café mudiye "mufiike" to. Mbulelela anu bwa menemene ebu.

²⁴ Mpindyewu tudi tujandula, kabidi mu Mifundu, tudi tujandula... Ne mémè mwine ncyèna mumoneku kabeji pa meesa apa diloolo edi to. Ngàmbi ne: "Ndeejaayi kaaba kamwe cyanaana kakaadiku Nzambi muteeke dingumba. Ndeejaayi kaaba kamwe cyanaana kakaadiku Nzambi muteeke muyiishi mukaji. Ndeejaayi kaaba kamwe cyanaana kakaadiku Nzambi muteeke dimyaminangana dya mâyi. Ndeejaayi kaaba kamwe cyanaana kakaadiku Nzambi muteeke dipongolwelangana dya mâyi. Ndeejaayi kaaba kamwe cyanaana kakaadiku Nzambi mwenzè ne muntu kampanda abatijiibwe mu dinà dya 'Taatu,

Mwânà, Nyuma Mwîmpè.’ Mpetelaayi bintu abi.” Kadi nansha nanku tudi anu tubyenza ku musangu ne ku musangu. Bidi anu munda mwa ekeleeziya bituule bipuwe.

²⁵ Mpindyewu, ngânwâmbìdi ne: “Mushindu, anyi, cìdi cyènza ne twètù katwikadi ba-Baptistes, mbwalu tudi twitabuuya ne bidi bikengela bwa bantu kubatijiibwabo mu Dîna dya Mukalenge Yesu Kilisto. Kacyakacya kakutuku muntu nansha umwe, mu Bible, ukààdikù mubatijiibwe mûngà mushindu to. Ndeejayi kaaba kamwe cyanaana kakaadiku muntu nansha umwe mubatijiibwe mu dîna dya ‘Taatu, Mwânà, Nyuma Mwîmpè,’ nêngèlè byanza muulu ngâmbè ne ndi muprofa wa mashimi.”

²⁶ “Kadi pîikalà Bible wamba ne nudi ne cya ‘kubatiijibwa mu Dîna dya Yesu Kilisto,’ s’mbwena kwamba ne nudi ne cya kucyenza mushindu awu. Pòlò wakabatumina dîyi bwa bôbò kubatiijibwa cyakabidi. Nansha mukaavwabo bamane kubatiijibwa amu, bivwa bikengela kulwabo, kubatiijibwabo cyakabidi. Bôbò bavwa babatiijibwe kudi muntu mwine umwèumwè wa bwena wâkabâtiiza Yesu Kilisto awu; Yone Mubatiiji. Yèyè kwamba ne: ‘Aci kacyakukumbana kabidi to. Bikengela nulwe, nubatiijibwe cyakabidi.’ Ne bivwa bikengela bwa bôbò kucyenza kumpala kwa kupetabo Nyuma Mwîmpè. Ki civwa ndongamu wa Nzambi ncyôci aci.”

²⁷ Ndi mufwanyine kuya anu ndambu mu ndondo kupita apu, diloolo edi. Bwa cinyi? Yesu utu ushaala mukwate ku Dîyi Dyende. Nudi nwtabuuya aci anyi? Mpindyewu, pamwe ne bônso baa kunudi nuwa apa mu dinda emu, kadi ndi muswe kutâmba kusuminyinapu ndambu.

²⁸ Civwa Pòlò mufwanyine kutum- . . . kutumina dîyi paanyima paa cyôci aci cimane kwenzeka ncinyi? Pòlò wakamba ne: “Nansha Mwanjelo mufume mu Dyulu mulwe kuyiisha nî ncinyi nî ncinyi cikwabo, ediibwe mulawu.”

²⁹ Mpindyewu nudi nwamba ne: “Tudi bapete Bukênkè bupyabupya pa bwalu abu.” To, kanwena naabu to. Aci ncivwa dyabulu mulwe naaci kudi Eva, Bukênkè bupyabupya kampanda. Kabyena binukengela Bukênkè bupyabupya to. Bidi binukengela kwendela mu Bukênkè budi Nzambi mumane kuteeka apa, kwajiki.

³⁰ Mpindyewu tangilaayi eci, mushindu udici cipepele. Pavwabo benda batuuluka ku Mukuna wa Dishintuluka dya mpala, Yesu wakamba, wambila bayiidi Bende ne: “Bantu badi bamba ne Mêmè Mwânà wa muntu ewu ndi nganyi?”

“Ewu mmwambe ne Wèwè udi ‘Môsà, anyi Eliya, anyi umwe wa ku baprofa.”

Yèyè ne: “Nwênù nudi nwamba ne nganyi?”

31 Yèyè kwamba, Peetelo kwambaye ne: “Wèwè udi Kilisto, Mwànà wa Nzambi udi ne mwoyi.”

32 Yèyè ne: “Udi mubeneshiibwe, Simona, mwànà wa Yona; bwalu kî mmusunya ne mashi bidi bikubuulwile eci to.” Nwamonu’s, kacyena cifumina ku ma-seminere to. Kacyena cifumina ku mangumba to. “Kî mmusunya ne mashi bidi bikubuulwile eci to. Kutu mucilongele mu kalaasa kampanda kaa teoloji to. Kadi Taatù Wanyi, udi mu Dyulu awu, ngudi mukubuulwileci. Nenku pa lubwebwe elu ki pângìbakilà Ekeleeziya Wanyi; ne biibi bya ku iferno kabyena mwa kumupita bukole to,” dibuulula dya nyuma dya ne Yèyè udi Nganyi.

33 Monaayi: “Nenku Mémè ndi ngamba ne wèwè udi Peetelo. Ne Mémè nênkupè nsapi ya Bukalenge. Nenku cyònsò ciwaswika pa buloba, Mémè nênciswikè mu Dyulu; cyònsò ciwasuulula pa buloba, Mémè nêncisùulùlè mu Dyulu.” Mpindiyewu, bivwa bikengela bwa Yèyè kushaala mulamate ku Dîyi Dyende cyanaana Yèyè kavwa Nzambi to. Mpindiyewu, paakenzaYe cyòcì aci, paanyima paa ndambu wa matuku, Yèyè wakapoopediibwa pa nkuruse, wakabiika ku lufu, wàkabànda mu Dyulu, nenku Peetelo kukangula Evanjeeliyo mu Dituku dya Mpenta. Yèyè ngwákacyèna anyi? Nyèyè, cya bushuwa, yèyè ngwákacyèna. Mpindiyewu tangilaayi, pavwaye mwa . . .

34 Bònsò bavwa babaseka, bwalu bavwa buujiibwe tente ne Nyuma. Baakababiikila ne “baabuludyanganyi, bansantu babunguluki baa mu malaba,” anyi dinà kampanda dya mushindu awu. Ne bòbò biine baakaseka, bamba ne: “Mbùle ne mvinyo mupyamupya.”

35 Ki Peetelo mwimane munkaci mwabo, kubàndishayè dîyi, e kwamba ne: “Balumyana ne bânà beetu, teejejaayi dîyi dyanyi. Teejejaayi mèyi aanyi mémè ne ngumvwayi. Bantu aba kî mbakwacike munudi nucinka ne mbakwacike amu to; tucidi anu pa dîbà diisâtù dya dituku. Kadi eci ncyakambabo kudi muprofeta Yowela ne: ‘Nebyenzeke ku matuku a ndekeelu ne, Mémè nêmpogololè Nyuma Wanyi,’ ne ciwvaYe mwa kwenza pa bânà Bende baa balume, ne bânà Bende baa bakaji, ne beena mudimu Bende bakaji, ne bikwabo, mu dituku adi.”

36 Nenku paakabangabo kuteeleja eci, baakalengiibwa mu myoyi yabo. Bwalu, baakumvwa muntu uvwa kayi mumanye nansha ABC to, kadi byakakengela bwa kumupabo maci, bamanye ne uvwa ne Cintu kampanda munda mwende, ciikàle cilakuka kapyà mu yèyè, Nyuma Mwîmpè. Ki kumwimanyika anyi’s? Mona’s, aci’s ciwva cifwanyine kwikala bu kuteeta kujima kapyà, pa nzubu mûme, dituku dya lupeepele lukole lùtuuta. Kamuvwa mushindu wa kucyenza to. Yèyè uvwa mùle tente ne Nyuma Mwîmpè. Kadi cyakenzaye ncinyi mpindiyewu?

37 Baakamba ne: “Ee, balumyana ne bânà beetu, citudi mwa kwenza ncinyi bwa kusungidiibwa?”

38 Mpindyewu wadimuka, Peetelo, wêwê's ngudi ne nsapi ya Bukalenge. Wamonu anyi?

39 Mpindyewu, paakabiika Yesu ku lufu mu dituku diisâtù, Yêyè kavwa ne nsapi ya Bukalenge bwa mu Dyulu to. Nuvwaku bamanye aci anyi? Wākamba ne: “Ndi ne nsapi ya lufu ne ya iferno,” pa kuumusha ya Bukalenge, bwalu ayi yôyi yikaavwa mimana kupa Peetelo.

40 Mpindyewu Yêyè wakamba ne: “Peetelo, cyônsò ciwasuulula pa buloba aci, Mêmè nêncisùlùlè mu Dyulu. Ciwaswika pa buloba aci, Mêmè nênciswikè mu Dyulu.”

41 Mpindyewu ki yêyè ewu mwimane ne nsapi ayi, bwa yêyè kukangwila baa pa buloba cintu cibenesha eci. Nenku's nyêyè ewu ne nsapi ayi mu cyanza cyende. Nenku bôbô badi bakonka ne: “Citudi mwa kwenza ncinyi bwa kusungidiibwa?” Mpindyewu, mupostolo nansha bu yêyè mwambe nî ncinyi nî ncinyi cyônsò cya kwenza, budi naabu Nzambi mbwa kuciitaba mu Dyulu, piikalabi ne Yêyè nguvwa mumupe bukookeshi abu.

42 Mpindyewu ki Peetelo kwambaye ne: “Nyingalalaayi, muntu ne muntu wa kunudi, nubatiijiibwe mu Dîna dya Yesu Kilisto bwa dilekelediibwa dya mpekaatu yenu, nenku nenupete kupà kwa Nyuma Mwîmpè.” Ncya bushuwa anyi? Nenku ki bwalu kaayi nsapi ayi yakanyunguluka mu Dyulu bwa dîna dikwabo kana dyônsò, mu mushindu mukwabo kana wônsò, mu mmwenekelu mukwabo— mmwenekelu mukwabo kana yônsò. Yakanyunguluka pa buloba, ne yakanyunguluka mu Dyulu, cyanaana Yesu kavwaku mushaale mulamate ku Dîyi Dyende kudi Peetelo to. Ne mwaba wônsò mu Bible wakabatijiibwabo, paanyima paa aci, baakabatijiibwa mu Dîna dya Yesu Kilisto. Ne aba bàkaavwà babatijiibwe kumpala kwa aci, byakakengela bwa kulwabo kubatijiibwa cyakabidi, mu Dîna dya Yesu Kilisto, bwa kupetabo Nyuma Mwîmpè. Aci ki cidid cijaalame. Bidi byenda biya anu mu mushindu umweumwe awu.

43 Pa nanku, twêtù tulongesha dibatiiza mu dîna dya “Taatù, Mwânà, ne Nyuma Mwîmpè,” aci nciprofeta cya mashimi. Mpindyewu ncyèna muswe kunutapa ku mwoyi to, kadi bidid bikengela mpoopele bwalu ebu bwa ekeleeziya ewu amanye ne ki mudici amu. Katwena mwaba ewu bu musumbà wa bakoleshi baa maalu kabayi balonge to; tuidi bamanye mwaba utuidi biimanyine mu Dîyi dya Nzambi. Nwamonu's, tuidi bamanye. Mêmè ndi ngeela muntu yônsò kadyombo nansha bamwamba ne nganyi bwa kundeejaye kaaba nansha kamwe kakaadiku muntu nansha umwe mubatijiibwe mu dîna dya “Taatù, Mwânà, Nyuma Mwîmpè.” Mpindyewu cinwateeleja ki ciprofeta cya mashimi anyi ki Bulelela? Kenketaayi Mifundu. Aci ncinutangile.

44 Ndeejayayi muntu umwe cyanaana mu Bible, mwaba ukaadiku ekeleeziya kampanda muteekiibwe bu dingumba

mu—mu Bible. Nundeeje mu Bible mwaba ukaadibo bateekeku muyiishi mukaji. Nundeeje mu Bible mwaba udi bintu byònsò ebi, bitudi twamba ebi, ukaadibi biteekiibweku mu Bible. Kabyenamtu to. Nungambilaayi mwaba umwe cyanaana. Ndaayi ku dingumba kampanda . . .

45 Ee, pàakajuukà ba-Méthodistes, bôbò baakayiisha dijidiibwa. Aci ncîmpè. Kadi, paakenzabo ciine aci, s'baakenza dingumba, nanku ki bwabo bumba bujika. Ki bwa cinyi Bible mmwambe ne: “Wêwè udi ne dînà.”

Wêwè udi wamba ne: “Mêmè ndi mwena Kilisto.”

“Ee, udi mwena dingumba kaayi?”

46 Wêwè udi wamba ne: “Méthodiste,” mona's, aapu's udi ndumba. “Ndi Baptiste,” ndumba. “Mwena Mpenta,” udi ndumba. Udi muntu wa yêyè ekeleeziya awu.

47 Bivwa bikengela wêwè kwikala muntu wa Kilisto. Kwèna ne bwalu bwa kwamba ne: “Méthodiste,” “Baptiste” to. Wêwè mwikàle mwena Kilisto, udi mwena Kilisto mu mwoyi.

48 Dyònsò dya ku mangumba awu didi mwa kupatula bânà, bânà baa Nzambi, ncyà bushuwa. Kadi paudi wela meeji ne neuye mu Dyulu anu bwalu udi Méthodiste anyi Baptiste, udi mu ntupakanyi. Nanku ki bwa cinyi twètù tudi bashaale pambelu paa cintu aci.

Ba-Baptistes kabeenaku mwa kumona bwa cinyi?

49 Mwya mukonke muntu mukwabo Méthodiste mwaba ewu, mwikàle ufunda mukanda wa cibungu, ùwùfunda kukaadi ntanta. Yêyè ne: “Cintu cimwepele citudi twètù tukubengela wêwè, udi mulamakane ne beena Mpenta.”

Mêmè ne: “Twètù' awu ki banganyi?”

“Twètù, ba-Méthodistes.”

50 Mêmè ne: “Ee, nènkwambilè cîngènà. Nèndwe mu cimenga cyenu amu kadi nushiile ba-Méthodistes batuule mfranga bwa cyòci aci.”

“Kaa,” ki yêyè awu, “mu bushuwa bwa bwalu, twètù katwena bafwanyineku kwenza aci to.”

51 Mêmè ne: “S'ki cîmvwà mudyâmbîdile menemene. Ndi nshaala ne beena Mpenta bwalu beena Mpenta mbadi baciitabuuja. Aci's ncyà bushuwa. Bôbò badi badyungwija bacinyungulukile. Bôbò mbadi bapeta bipeta bîmpè bya ku cyòci aci.”

52 Mbanganyi bàdîku babale kanungu aku mu cikandakanda cya *Life*, anu abidi adi panshi aa, pa bidi bitangila ekeleeziya wa beena Mpenta? Ki cimwe cya ku bintu bidi bikemesha bidi bitambe bunene mu cikondo eci. Mbapete bantu bààbûngî badi bakudimune mucima mu cidimu cimwe kupita ekeleeziya mikwabo yònsò misanga. Bwa cinyi? Nansha mu bilema

byabo biine abi, Nzambi udi anu ubatuma kumpala, bwalu badi biitabuujja Bulelela ne batungunuka ne kwenda naaBu. M'Bulelela.

⁵³ Kadi citudi twêtù twenza ncinyi mpindyewu? Nwamonu anyi? Ki cidi cyenza ne twêtù katwikadi dingumba ncyôci aci. Nenku anu mùdibi bushuwa ne beena Mpenta mbadivwije dingumba . . .

⁵⁴ Nenku kalekale wawa, pààkapòngolokà Nyuma Mwîmpè musangu wa kumpala pa ekeleeziya wa beena Mpenta, kukaadi bidimu makumi anaayi, ki bôbò kubanga kwakula mu myakulu, dimwe dya ku mapà. Ki didi ditambe bukese dya ku mapà ndyôdi adi. Ki didi ditambe kushaadila dya ku mapà, bilondeshile Pòlò Munsantu, ndyakula dya mu myakulu. Nenku ndyenze anu dipona anyi: “Kaa,” ki bôbò abu, “twâMupeci mpindyewu,” ki kwenzabo dingumba, Nsangilu wa Bantu bônso, udi leelu Assemblées de Dieu ewu. “Kaa, muntu nansha umwe kèna muMupete to paudi kuyi wakula mu myakulu,” ki Nzambi kumba kutapuluka naabo, ne kubashiya basòmbe mwaba awu. Ncya bushuwa. Eyowa’s, mukalenge.

⁵⁵ Pashiishe kulwaku ba-Unitaires, ki bôbò kujandula dibatiiza dya mu Dîna dya Yesu. Bôbò ne: “Kaa, twâMupeci,” bôbò kudyenza bulongolodi. Cyakenzabo ncinyi? Nzambi kumba kupatukamu ne kubashiya basòmbe mwaba awu.

Cilumbu ncya ne: “Ewu yônso udi muswe, alwe.”

⁵⁶ Nwamonu’s, ba-Unitaires kabayi mwa kuya kudi beena Assemblées. Beena Assemblées kabayi mwa kuya kudi ba-Unitaires. Mvwa muyiikilanganeku ne bamwe baa ku bantu baa batambe bwîmpè badibo naabo, Mukalenge Goss, ne Docteur Pope, ne bààbûngi. Bantu badi bantu baa banene mu . . . Mémè kusomba naabo. Mémè kwamba ne: “Mmunyi mùdi mwa kuyiisha aci bu cileeeji cya mbangilu, peebe mumanyi mujima wa dibàla?”

⁵⁷ “Ee,” ki yêyè awu, “Mwaneetu Branham,” umwe, babidi anyi basatu baabo, bavwa menemene baa kweyemena, bôbò ne, “tudi bamanye ne aci ncya mafi, kadi citudi mwa kwenza ncinyi? Twêtù badidinge anu bambe cintu kampanda cya cibegangane naaci mpindyewu, mona’s, s’necinyangakaje ndongamu mujima.” Bushuwa, ne wêwè mwine kwakwikalaku kabidi mwepiskopo to, anyi mutangidi wa bônso. Ki mmwenenu nyawu’s.

⁵⁸ Mwaneetu, abi’s mbipiciibwe ne mémè mwikàle ne kaacitanda kakese mu disangu, anyi kuyiishila mwinshi mwa mucu wa pin, ne mwikàle ne Bulelela, ncya bushuwa, kadi mwikàle mumanye ne udi wamba Bulelela. Muntu cidiye ukeba m’Bulelela. Nenku wêwè udi mwenzejiibwe, wêwè bu mwena Kilisto, bwa kufidila Bulelela bujaadiki. Nzambi neakwomekele bujitu bwa cyôci aci.

59 Pashiishe, mu maalu aa, pawikala kuyi mubatiijiibwe mu Dîna dya Yesu Kilisto to, ne kuyi mwenze bintu ebi to, ne kuyi mupete Nyuma Mwîmpè to . . .

60 Wêwè udi wamba ne: “Kaa, mêmè’s ntu mwakule mu myakulu.” Aci kaciyena ciswa kwamba ne udi mupete Nyuma Mwîmpè to.

61 Mêmè nkaadiku mumonemone baamwamulopo, bantu balume bampakaamanga, badémóns, ne bikwabo byònsò, baakula mu myakulu. Cya bushuwa. Kabatu ne Nyuma Mwîmpè to, ne nwênù nudi bamanye aci. Banwina mashi mu tubalubalu twa mitu ya bantu, ne baja maja, basoka dyabulu, ne baakula mu myakulu. Cya bushuwa. Kabatu ne Nyuma Mwîmpè to.

62 Nenu, bwalu utu mwakule mu myakulu, aci kaciyena ciswa kwamba ne udi muMupete to. Mushindu umwepele wûdi mwa kumanya ne udi muMupete, mpadi nyuma webe ufidila Nyuma Wende bujaadiki, ne mamuma a Nyuma miikale akufila: dinanga, diitabuuya, disanka, ditalala, mwoyi mule, bwîmpè, bupole, kalolo. Ki paudi umanya ne udi mupete Nyuma Mwîmpè. Udi uDifidila Yèye mwine bujaadiki.

63 Mpindyewu, paudi uteeta kushindameena pa ne, bwalu udi mwena Assemblées, anyi Baptiste, anyi Presbytérien, udi umona cyûdi wenza aci anyi? Udi wangata dîna dya ndumba. Ncya bushuwa menemene. Patuka mu cintu aci. Nda kule naaci. Ncyèna nswa kwamba ne nkupatuka mu ekeleeziya webe anyi cintu kampanda to; wêwè enza anu cyûdi muswe kwenza pa bwalu abu. Kadi umuka ku dyeyemena bya ne: “Kaa, mêmè’s ndi Presbytérien. Katutu twitabuuya bya matuku a bishima abi to.” Kanwena nuciitabuuya bwa cinyi? Bible’s ngudi ucilongesha. “Kaa, mêmè ndi mwena Église de Christ. Batu bamba ne matuku a bishima akaadi mamane kupita.” Abu mbaprofeta baa mashimi.

64 Mêmè ndi mwa kukuleeja mwaba wakafila Yesu Kilisto Bukole kudi Ekeleeziya, bwa kwondopa babeedi, ne kubiisha bafwe, ne kwipata badémóns. Ndi ngeela nî nganyi nî nganyi kadyombo bwa kundeejaye Mufundu mu Bible mudiYe mubûmûshe mu Ekeleeziya. Cidi cibûmûshe ncinyi? Mèyi enu anudi badiswikile awu, mmmwômò, kî n’Diyi dya Nzambi to. Nyuma Mwîmpè uci anu wenzeja mudimu awu, mwikàle utungunuka anu mushindu umweumwe awu, ne Yèye neatungunuke kashidi ne kuwenza.

65 Ki cidi cyenza ne twêtù katwikadi dingumba to: “Biikàle ne cimwenekelu cya difwana dya Nzambi, kadi biikàle bavila Bukole bwadi; umuka kudi baa nanku awu.” Twêtù katwena twitabuuya mu bintakanyi bya nanku awu abi to.

66 Mpindyewu, ciine aci cyakabanga mene bishi? Bikengela tulwijakaje bwa kukafika ku cyôci aci ne lukasa lwònsò mpindyewu, mushindu mene wakabangaci. Mpindyewu tudi ne

Mifundu bûngi cyanaana mifunda mwaba ewu pa bidi bitangila Nyuma Mwimpè.

⁶⁷ Ne cikwabo cintu, tuvwa beele kadyombo makeelela diloolo, pa “dinanukila dya bansantu,” kabiya mu mushindu udi ba-Baptistes baciitabuuja awu to. To, mukalenge. Mèmè ndi nshiilangana ne ba-Baptistes ne wabo mmwenenu awu, pa dilongesha dyabo dikwatakaja dya Calvinisme adi. Ncya bushuwa ne ndi mbengangana ne ba-Presbytériens. Ndi mbengangana ne ba-Méthodistes pa dilongesha dyabo dya Arminianisme adi. Eyowa’s, mukalenge. Kadi bubidi bwabo badi bônso ne bulelela kampanda, kadi bikengela walukile paanyima *Apa* padici ciikàle Bulelela. Paudi unyeema lubilu upatuka pambelu pààpa, udi upeta naaci mukupa. Mbushuwa.

⁶⁸ Ba-Baptistes badi babwela, babatiiza bantu babidi apa, mu dibiinyija dya mu mâyi; ki muyiishi ubabatiiza, bantu citeema pa dikumi biikàle banwa mfwanka, baalukila bakiimana pambelu pààpa, banaya twarta, banaya manayi a mubela bufuku bujima, banyeemakana eku ne eku, ne benza bintu bikonyangale mu mishinga; ne bakaji bônso bavwala tuputulu pambelu apa, banyeemakana eku ne eku mu misèèsù, ne babebula nsuki yabo, biikàle—biikàle banwa mfwanka ne balabakana, benza tuumafètes twa ditela ne diluka mipilu, benza mineku ya bundu. Nudi nubiiikila ciine aci ne mbwena Kilisto? Kadi kudyambidila peenu munudi ne dikubiibwa dya Cyendelelele amba’s? Nwènù’s nuyaaya mu iferno mu mushindu awu. Kanwenaku bafwanyine kusankila mu Dyulu to nansha bya munyi. Nansha kakese. Aci kî ndikubiibwa dya Cyendelelele to.

Kadi muntu yèyè mulediibwe cyakabidi ku Nyuma Mwimpè. . .

⁶⁹ Ne wèwè mwena Mpenta, anu bwalu udi mutupike muulu ne panshi, mwakule mu myakulu, munyeemakane mutwe eku mutwe eku kwa kajila, aci kaciyena ciswa kwamba ne udi ne dikubiibwa dya Cyendelelele nansha. Kwikadi waditeekelaku aci mu mutu webe amu to. To, mukalenge. Kaciyena ciswaku kwamba nanku to. Bwalu, udi mumanye ne nsòmbelu webe yèyè mwine—webe yèyè mwine awu, udi ukufidila bujaadiki ne, kwèna mujaalane kumpala kwa Nzambi to. Ncya bushuwa. Kwèna mujaalane to. Aci, kî ncyanji kwikala dikubiibwa dya Cyendelelele to nansha kakese.

⁷⁰ Kadi nyawu njinga kunukonkaku cintu kampanda. Kadi nyawu njinga kunukonkaku cintu kampanda. Kutuku dikubiibwa kampanda dya Cyendelelele anyi? Bible udi wamba ne didiku. Bible mmwambe ne mènà etu akafundiibwa mu Mukanda wa Mwoyi wa Mwànà wa mukooko kumpala mene kwa dyulu ne buloba kabiyiku byanji kubanga to.

⁷¹ Anu bu mûngãmbi mu dinda emu, ndi ncyambulula. Muntu wâkafûnda musambu wa ne: “Nkufundiibwe dînà

dipyadipya mu Butumbi diloolo edi, diine adi ndyanyi mêmè” awu, meeji èndè àvwa mîmpè, kadi yèyè uvwa mutupakane, bilondeshile Mifundu. Dînà dyebe kî ndifundiibwe diloolo dyûdi musungidiibwe adi to.

⁷² Dînà dyebe, bilondeshile Bible, bilondeshile Bwakabuulwibwa 13, 17, ne bikwabo, “dyakafundiibwamu kumpala mene kwa dyulu ne buloba kabiyiku byanji kubanga to; ne Yesu Kilisto wakashiibwa kumpala kwa difùkà dya dyulu ne buloba.”

⁷³ Mmunyi muvwa Nzambi, Yèyè udi kayi mikalu, awu mmunyi muvwa Nzambi udi kayi mikalu, mumanye ndekeelu kumpala kwa ntwadijilu, mmunyi muvwaYe mufwanyine kwitabila mpekaatu bwa kulwaye pa buloba, piikalaci kacyi bwa kabingila kampanda?

⁷⁴ Anu bwa kutwa mpindyewu nyama ku mikolo bintu kampanda bitudi bambe. Ukaavwaku kumpala nganyi, n’Musungidi anyi nngènzàmpèkààtù? [Muntu kampanda mu disangisha udi wamba ne: “Musungidi”—Muf.] Musungidi, cya bushuwa. Udi mutambe bukole ki nganyi, m’Musungidi anyi nngènzàmpèkààtù? Piikalabi ne Musungidi udi ne bukole bwa kuumusha mpekaatu, Yèyè’s ngudi mutambe bukole. Ee, bwa cinyi Yèyè wakalekela mpekaatu wanji kwenzeka dyambedi? Bwa kuleeja ne Yèyè nguvwa Musungidi. Udi mutambe bukole nganyi, mmwondopi anyi ndisaamà? Mwondopi. Kadi bwa cinyi Yèyè wakalekela disaamà dilwa? Bwa kuleeja ne Yèyè nguvwa mwondopi. Kadi ngàavu kuumvwa bwena Nzambi bwàmbwedì mpindyewu. Eyowa’s, mukalenge. Kaa, ekelekele! S’ki byambibwa Byende mbyòbì abi.

⁷⁵ Ki bwa cinyi Yèyè utu ulekela lutatu lulwa. Ki bwa cinyi utu ulekela tunyinganyinga tulwa, bwa kuleeja ne Yèyè ki udi disanka. Cya bushuwa, ki mudibi. Ki bwa cinyi tutu ne bufuku, bwa kujaadika ne mundaamuunya mùtukù. Ki bwa cinyi tutu ne ciiji, bwa kuleeja ne kùtu ditalala. Cya bushuwa, bidi anu cimpè ne cibi. Kaa, Yèyè’s mmulenga wa dikema.

⁷⁶ Mpindyewu, cyakabanga bishi? Netuye buludi ku cyôci aci, tuyaku ne lukasa lwônsò, bwa ncilu kunulama bufuku bujima to. Mpindyewu, kudi ne cya kwikala ntwadijilu wa bintu byônsò.

⁷⁷ Nenku ndi njinga kunukonkaku cintu kampanda. Mpindyewu eci cidi mwa. . .Ucibweje anu mu mpaaya wa nkooci webe amu. Kabyena bikengela bwa wèwè kwela cyôci eci kucisambakaja ne byakudya bya mu dilongo dyebe dya ciibidilu abi to. Kadi teejeaayi eci nenku.

⁷⁸ Pawikala cifùkiiibwà cya Cyendeleele, nanku kùtukù mwanji kwikala ne ntwadijilu, anyi kwèna mwa kwikalaku ne ndekeelu nansha. Bwalu, wa *Cyendeleele* udi ufuma ku mwaku udi wamba ne “udi kayi ne ntwadijilu anyi ne ndekeelu.”

⁷⁹ Kanwena bacivuluke anyi? Mwya mwambe, mu dinda emu, mùvwà Melekisedeke, paakatuutakeenaye ne Abraham pavwaye ufuma ku dishebeya dya bamfumu. Nenu Bible mmwambe, mu Ebelu 7, ne—ne: “Lewi wakafuta byadiikumi kudi Melekisedeke, pacivwaye mu twonyi twa tatwëndè Abraham.” Abraham wakalela Izaka; Izaka wakalela Yakobo; Yakobo wakalela Lewi. Aci civwa taatù, kaaku, ne kakwëndè wa taatù. Nenu pacivwa Lewi mu twonyi twa kakwëndè wa tatwëndè, Bible udi umupa luumu lwa ne wakafuta byadiikumi kudi Melekisedeke. Nwènú badi baakula bwa wa Cyendeleele! Ekelekele, ekelekele! Katu mwambeku ne: “Yêyè wakacyenza mu cimfwanyi; wakacyenza mu mushindu mushaadile” to. Bible mmwambe ne: “Wakafuta byadiikumi.” Amen.

⁸⁰ Nenu, piikalabi ne twètù aba tudi bavwile ku dimiinu dya cya bushuwa, pavwa Pòlò uyiisha Evanjeeliyo apu mèmè mvwapu ne wèwè uvwapu. Netubwele mu cyòci aci, anu mu kasunsa kamwe cyanaana, tuya too ne mu ndondo. Monaayi, aci nciidi Mufundu utwambila, twètù, walukila ne paanyima menemene.

⁸¹ Anji elayyi meeji! Lewi; pashiishe Yakobo, tatwëndè; pashiishe Izaka, tatwëndè; pashiishe Abraham, tatwëndè; kakwëndè wa tatwëndè. Pavwa Lewi mu twonyi twa kakwëndè wa tatwëndè, ki paakafutaye byadiikumi kudi Melekisedeke.

⁸² Ndi musweku kunukonka. Ewu nganyi, Yobo 27...38, paakambaYe ne: “Wèwè ewu uvwa penyì pâmvwà Mèmè nteeka bishimikidi bya buloba? Pavwa mitooto ya mu dinda yimba cyapamwe, ne bânà baa Nzambi beela mbila ya disanka?” Bânà baa Nzambi bàvwà beela mbila ya disanka abu bavwa mbanganyi? Yesu wakabambila, ne: “Mwya nsanka neenu kumpala kwa difùkà dya dyulu ne buloba.” Twètù aba katwena bifùkiibwà bya cikondo to. Tudi bifùkiibwà bya Cyendeleele.

⁸³ “Muntu nansha umwe kèna mwa kulwa Kùndi, padi Taatù kayi mumukoke to. Ne bônso badi balwa Kùndi, Mèmè nêmbàpè Mwoyi wa Cyendeleele, ne nêmbàjuulè ku matuku a ndekeelu. Muntu nansha umwe kèna mwa kubanyenga mu cyanza cya Taatù Wanyi, Yêyè udi mubãMpè awu to.” Neujimije bishi?

⁸⁴ Wamonu’s, wèwè udi ne bwôwà. Udi uciina. Neunyeemakane eku ne eku mwaba ewu. Nenu ki cimwe cya ku bileeji bya bitambe bwîmpè ncyòci aci, pa buloba, cya ne wèwè kutu mwanji kufikaku mwaba nansha umwe to. Neya bushuwa. Mmunyi mudiku Nzambi mufwanyine kukusungila piikalaYe . . .

⁸⁵ Mbanganyi mu ekeleeziya emu badi bafwanyine kwela byanza muulu, ne kwitabuuja ne Nzambi katu ne mikalu? Nudi bamanye cidi mwaku ewu *kayi ne mikalu* umvwija anyi? Aci’s cidi anu cipwangane. Kayi ne mikalu, kanwena—kanwena mwa kuumvwija mwaku *kayi ne mikalu* to.

⁸⁶ Ukààdikù mwangate cyamu cyebe cya fòtò muciteeke mu mushindu wa mèsù kacya anu aaya anyi? Mona's, cidi ciswa kwamba anu ne kubangila mwaba udici awu kadi kuya. Eyo. Kakuciyi kabidi mushindu wa kuciludikila to.

⁸⁷ Ee, ki cidi Nzambi ncyôci aci. Yêyè katu ne mikalu to. Piikalabi ne Yêyè katu ne mikalu, kî nkufwanyineku kwikala nî ncijangalala, anyi lujijii, anyi nkùpà, anyi nkùsù, anyi kabwasa, anyi cintu nansha cimwe cikaadiku pa buloba, anyi ciikalàku, civwa Nzambi kayi mumanye kumpala kwa dyulu ne buloba kwenjiibwabi to. Ki ndambu wa cingenyinyenyi cya cidi kaciyi ne mikalu ncyôci aci.

⁸⁸ Ee, dîbà adi, Nzambi udi kayi ne mikalu Ukusungila mwaba ewu, mwikàle mumanye ne Yêyè neakujimije lumingu lùlwalwà elu, anyi ngondo ulwàlwa ewu, anyi cidimu cilwalwà eci, mona's, Yêyè's udi munkaci mwa kunyangakaja kiipacila kiine. Kêna mwa kukujimija to. "Ewu udi uteeleja Méyì Aanyi, ne witabuuja Ewu udi muntume Mêmè, udi ne Mwoyi wa kashidi ne yêyè kaakupicilaku ku Cilumbulwidi to, kadi ùkaadi mumuke ku lufu muye ku Mwoyi." Kêna mwa kucyenzaku to. Kwêna kabidi mufwanyine. . .

⁸⁹ "Ewu udi mulela kudi Nzambi kêna wenza mpekaatu to; bwalu dimiinu dya Nzambi didi dishaala munda mwende, ne kêna mwa kwenza mpekaatu to." Mmunyi mudiye mwa kwenza mpekaatu padi mulambu wa mpekaatu mwikaleku bwende yêyè?

⁹⁰ Mmunyi mûndi mwa kwikala nsaama pândi mwikàle ne mubidi tumatuma? Mmunyi mûndi mwa kwikala mpofo piikalabi ne ndi mmona? Kaa, ekelekele! Mmunyi mûndi mwa kwikala munda mwa nzubu kadi mwikàle pambelu paa nzubu musangu umweumwe awu? Mmunyi mûndi mwa kwikala mukwacike maala ne nciyi mukwacike maala musangu umweumwe awu? Kacyena mwa kwenzeka to.

⁹¹ Nenuk paudi musungidiibwe, udi mwinshi mwa Difuta dya cibawu, ne mpekaatu yebe kabeena bakubadilayi to. Davidi kaakambaku ne: "Dyakalenga didi kudi muntu udi Nzambi kayi ubadila mpekaatu, ne kayi umubalulwila mpekaatu" anyi? Nzambi katu ulaminyina cifukiiwbà Cyende mpekaatu to. Aci's ncikole. Aci kî ncipeepele to. Kadi m'Bible. Nzambi kaakubadila muntu mwakane mpekaatu nansha.

⁹² "Nzambi," ku ngàsà Wende, ku didyanjila-kulongolola, "kayi muswe bwa ne muntu kampanda afwe to, kadi bwa bônso bafike ku kanyinganyinga." Kadi mwikàle kayi ne mikalu, ne mumanye ne nganyi wâlwa ne nganyi wabenga kulwa, Yêyè uvwa mwa kudyanjila kulongolola maalu ônsò bwa kukwatawu mudimu bilondeshile diswa Dyende. Piikalabi ne Yêyè kavwa mwenze nanku to, kadi Yêyè wakanji kwitabila mpekaatu dyambedi bwa cinyi? PavwaYe Musungidi. . . Bu ne

kakuvwaku kwanji kwikala ngènzàmpèkààtù to, Yèyè kavwaku mwa kwikala Musungidi to; cyambiibwa aci, civwa munda Mwende aci, kacivwa mwa kwikala cipatudiibwe patooke to.

⁹³ Mmunyi mwakashaalaYe mene mwondopi? Mmunyi mwakashaalaYe mene mwondopi? Mbwalu Yèyè wakiitabila disaamà bwa kulwadi, bwa Yèyè wamona mwa kudileeja Yèyè mwine mwondopi. Yèyè uvwa mwondopi. Mmunyi mùvwà wèwè ewu mwa kwikala . . . Mmunyi muvwàYe mene mwa kumanyika? Mmunyi muvwà mene cyambiibwa Cyende aci mwa kukwata mudimu? Mmunyi muvwàYe mene mwa kwikala mwondopi, bu ne kakuvwaku disaamà nansha dimwe? Bivwa bikengela bwa Yèyè kwitabila disaamà.

⁹⁴ Kabyena bikemesha to, paakamba Pòlò, mu Loomo 8 ne: “Wèwè muntu mukutakane, nganyi udi mwa kwambila mu—mufumbi cidi cikengela kwenza bwa bwalu abu; nganyi, paakajuuka diima kwamba ne: ‘Bwa cinyi, wèwè, ungenza mushindu ewu?’ Yèyè kî ngwàkajuula Pâlò bwa kiipacila kamwekamwe aku, bwa Yèyè wamona mwa kuleeja bukole Bwende mu Ejipitu anyi? Yèyè udi ukolesha mucima wa udiYe muswe kukolesha mucima awu, ne Yèyè udi ubingisha udiYe muswe kubingisha awu. Kî ng’ewu udi muswe, anyi ewu udi unyeema lubilu to, kadi n’Nzambi udi uleeja luse.”

⁹⁵ Pa nanku, wèwè kî nguvwa ne bwalu bwa kwenzamu to. Kwèna ne cintu nansha cimwe cya kwenza to. Piikalabi ne nngâsà, piikalabi ne ndipà dya kuyi ufuta kantu to, kakwena cintu nansha cimwe cyùdi mwa kwenza pa bwalu abu to. Nzambi ngudi mukupeesheci, nenku diswa dya Nzambi ndyôdi adi. Ncintu cidi Nzambi mudyanjile kukulongolwela.

⁹⁶ Bible mmwambe ne “tuvwa badyanjila kulongolola bwa kwikala bânà baa balume bwa diteekibwa, bânà baa balume baa Nzambi, kumpala kwa difùkà dya dyulu ne buloba.” Nenku, pààkashipà Nzambi Mwânà wa mukooko, mu meeji Ende Yèyè mwine, kumpala kwa difùkà dya dyulu ne buloba, bwa kujaadika byambiibwa Byende, civwaYe aci, pààkashipiibwà Mwânà wa mukooko apu, twàkashipiibwa pamwe Nende. Pààkalamiibwà Mashi a Mwânà wa mukooko mu meeji Ende Yèyè mwine, kalekale wawa kumpala kwa difùkà dya dyulu ne buloba, dînà dyanyi ne dînà dyebe akafundiibwa mu Mukanda piine apu, ônsò mu meeji Ende manene awu.

⁹⁷ Yèyè kèna ne mikalu to. Bu ne Yèyè uvwa ne mikalu, mbwa cinyi bwakaciitabilaYe? Udi mutambe bukole nganyi, (mûngâmbi) m’Musungidi anyi nngènzàmpèkààtù? Udi ne dikanda ditambidile nganyi? Nanku, udi ne dikanda ditambidile awu’s ngudi witabila udi mushaadile, ne Yèyè’s udi ucyenza anu bwa butumbi Bwende. PààkafùkàYe Lucifer, Yèyè’s uvwa mumanye ne yèyè awu neikale dyabulu. Bivwa bikengela bwa kwanyishaYe nanku mwaba awu bwa kuleeja ne Yèyè

uvwa Musungidi, Kilisto. Bivwa bikengela acilekele cyenzeka mushindu awu.

⁹⁸ Mpindyewu, Bible kênàku wamba, ne: “Maalu ônsò adi akwata mudimu bwa dyakalenga dya badi banange Nzambi” anyi? Mwaba awu bwôwà bûdì naabu mbwa cinyi?

Tujuukaayi bwa twènzè mudimu,
Mwikàle ne mwoyi wa mvita kana yônsò.
Kwikadi bu ngombe yìdì cimùmà yidibo
benda basaka to, bikengela bwa biikalè
bakusengeleela ne bakutwishisha!
Kadi ikala cilobo!

⁹⁹ Mêmè ntu munange aci. Juukila kuulu! Kasala kakese kàvwà katamba kunkwacisha mêmè ewu pâncìvwà mwânà, kiikàle kamba cintu cya bu nunku ewu:

Kuvw'eku mwena Loomo mwende luumu,
Mu matuku a Mfumu wa bukalenge bwalabale
bwa beena Loomo;
Wàkumvwa mutulumuke kampanda wa dîyì dipate,
Kumpala kwa nzubu wa bukalenge wamba ne:
“Kaa, mudi dikubiibwa be mu mucu wa sapin
bu ewu,
Kakwena muntu nansha umwe udi mwa
kuwunyukushaku to.”
“Kaa, to,” mwàkambà cilobo aci,
“Mêmè nènkebè mushindu anyi nêncyènzè.”

¹⁰⁰ Ki bwalu mbwôbù abu's. Ncya bushuwa. Piikalabi ne Bible ewu udi ulongesha ne Yesu Kilisto udi umwèumwè awu makeelela, leelu, too ne kashidi. . . Kacivwa cintu cipeepele to pângààkapàtukà mu tabernacle ewu dituku adi, ne bantu bônsò biikàle bangambila ne *cikampanda* necyenzeke, ne *cikansanga* necyenzeke. “Mbafwanyine kukwangata bu mukoleshi wa maalu, bakwela mu buloko, ne nsangilu mujima wa maalu a dyondopangana mufwanyine kukulwisha.” Kadi Nzambi's nguvwa mwambe bwa kucyenza. Bible ngudi mwambe ne ki civwaYe. Kadi mpindyewu's kapyà kaa ditabuluja kakaadi kateeme mu ditunga ne ditunga dyônsò mwinshi mwa Dyulu. Bwa cinyi? Ikàlà mucimànyìne kamungulu!

Utu ubundula mudimu webe dituku ne ku dituku bishi?
Utu ne bwôwà bwa mudimu wûtù upeta anyi?
Utu mwa kwimana kamungulu bwa mudimu wùlwalwà kumpala kwebe anyi?
Ukààdi ne meeji macyoke ne a munda mutupu anyi? (Mêmè's ntu mukine aci cintu.)

Anyi udi wimana kamungulu bwa mudimu
 wùlwalwà kumpala kwebe,
 Anyi bwôwà ki budi bwendakanamu?
 Byôbì nanku, bundula ùdì ùlondà wùdì upeta
 awu,
 Mu kwela kwa meeji ne neùwënzè.

¹⁰¹ Shaala naawu. Cya bushuwa. Udi pangadikile mu mwoyi webe, bu Danyeale. Shaala ne Nzambi.

¹⁰² “Byônsò ebi mbyenzekele penyi? Mbyenzeke bishi’s? Cidi cyènza bantu nunku ewu ncinyi? Bwa cinyi tukaadi anu pabwîpî menemene ne kubutudiibwa? Mwaneetu Branham, anji ngumvwijaku tûng. Ncinyi cidi cikufikisha ku dyela meeji ne cintu cyônsò eci mu kaabujima cidi ne cya kubutudiibwa?” S’cikaavwaku cibusudibwe musangu kampanda kumpala, (mmwômò anyi?) mu kabutu kaa mvula wa Noa. Mpindyewu ki bimwe bintu bya mu ndondo bilwalwà ebi. Nenku netudilongolole bwa kubala.

¹⁰³ Mpindyewu ndi muswe nubuululeku pamwe naanyi mpindyewu, mu Mukanda wa Genese, mu nshapita mwi3. Nwênù nujinga kumanya cintu kampanda, ndi mwa kunuleeja mu Mukanda ewu wa Genese mwaba udi ntendeleelu yônsò ne kasumbu kônsò, ne byônsò bitudi naabi leelu wa Ndaaya ewu ebi, bibangile mu Genese. Mbanganyi badi bamanye ne mwaku ewu *Genese* udi umvwija “mbangilu”? Cya bushuwa.

¹⁰⁴ Tudi tusangana ekeleeziya wa Katolike ku cibangidilu, Baabulona, Nimrod mwikàle mumwashi; tudi tumusangana munkaci mwa Bible, tudi tumusangana kundekeelu kwa Bible; tudi tusangana, mwikàle kuteeta kwa kutwala bayiishi bakaji, ku mbangilu wa Bible, mu kukuukwila kwa tupingu tukese tudibo benze ne miji ya mici. Mbanganyi bàkaadiku babale *Baabùlônà Yibidi*, wa Hislop, bwalu bulonda abu? Eyo. Nujandulaayi, mu maalu malonda aa. Bavwa ne muntu mukaji. . . Ne pashiishe, nudiku bavuluke anyi? Nansha Yakobo wakiiba nzambi ya tatwëndè, nenku mwanende wa bakaji kuyisokokaye mwinshi mwende ne kulwa kuyipatula mu cipeela mwamwa, ciine cyàkakooyishà cituudilu aci, pààkapitá matuku. Eyo.

¹⁰⁵ Tubalaayaaku mpindyewu mu Genese emu.

Mpindyewu nyoka nguwu mudimuke kupita nyama yônsò wa mu mpàta uwuwa MUKALENGE Nzambi mufuke. Ki kwambilaye mukaji ne: Eyo, Nzambi utuku mwambe ne: Kanudi ku mucu wônsò wa mu budimi anyi?

. . . mukaji kwambilaye nyoka ne: Tudi mwa kudya ku mamuma a mici ya mu budimi,

Kadi ku mamuma a mucu. . . munkaci mwa budimi, Nzambi mmwambe ne: Kanukudi to, anyi kanukulengi to, bwa nwênù kanulu kufwa.

Ki nyoka kwambilaye mukaji ne: Bulelela kanwakufwa to,

Bwalu Nzambi mmumanye bîmpè ne dituku dinwikala mwa kukudya, pa dîbà adi mèsù enu neatabale, (nwamonu's, dyenda dikebangana ne Bukênkè bupyabupya), ne nenwikale bu banzambi, bamanye maalu mîmpè ne maalu mabi.

¹⁰⁶ Nudi numona mudi balumyana aba leelu ewu anyi, bateeta bwa kuumushila ku Bible? “Mona's, kî mbipepeleku bwa kwikala kupongolwelangana, anyi kumyaminangana mâyî pa mutu, anyi mushindu *kampanda*, anyi mushindu *kansanga* anyi?” To, mukalenge. Nzambi mmuteeke ndongamu, nenku yèyè awu ki utudi ne cya kulonda, *Ewu*.

Nenku paakamona mukaji ne mucu uwu mwîmpè bwa kudya, ne uwu wenza disanka ku disù, ne mucu bwa kuvwija. . . ukengela kujinga bwa kuvwija muntu ne lungenyi, yèyè wakangata bimuma byawu, ne wakadya, ne wakapa pende bayende uwu nende; ne yèyè wakadya.

Ne mèsù abo bônso babidi akatabala, ne baakamanya. . . ne bavva butaka; ne baakatelakaja mabeji a mfigi, ne baakadyenzela wôwò awu mbondya.

¹⁰⁷ Ndi njinga kwimana kaaba aka bwa katanci kakese. Mpindyewu, kuvwa ne cya kwikala mbangilu wa bintu byônso. Wèwè uwu ne mbangilu. Mpindyewu twètù. . . Mwaba ewu ki wûndi njinga kuteekela nshindameenu wa cintu cyônso mu kaabujima, mpindyewu, citudi bambe mu masangisha abidi a ndekeelu aa, too ne apa.

¹⁰⁸ Mpindyewu, mu dinda emu tudi baalukile cyanyima ne babileeje bu dinaya, mu Bible ne, pavwa Nzambi wenza buloba, pashiishe pavwaYe wenza ma-gaz apu; ne pashiishe ki ma-gaz awu kwandamukawu calcium, ne potasse, ne—ne bintu bishiileshiilangane. Ûvwa munkaci mwa kwenza mubidi webe. Ûvwa munkaci mwa kwibaka nzubu, mushindu udi mwibaki mwikàle mulongeshi munene, mwenze bu mwenji wa makumi a bya dyasa naabi uteeka bintu byende bya dyasa naabi nzubu. Ûvwa munkaci mwa kwenza mubidi webe, ne Ûvwa munkaci mwa kuwadija mwaba awu. Yèyè uwu mumanye anu menemene, mu meeji Ende amu, civwà ne cya kwenjiibwa.

¹⁰⁹ Cyanza *eci*, Nzambi wakenza cyanza aci kumpala kwa Yèyè. . . pavwaYe munkaci mwa kwenza dyulu ne buloba apu; kadi, nyuma wanyi Yèyè wakamwenza kumpala kwa dyulu ne buloba kabiya byanji kwikalaku to. Mpindyewu, kadi cyanza *eci* ne mubidi ewu, Yèyè wakabyenza pavwaYe munkaci mwa kwenza dyulu ne buloba apu, bwalu mubidi ewu mmufumine ku buloba, ne newalukile ku buloba. Nzambi ngwàkenza nanku.

Wakawadija wònsò mu dizola Dyende dinene ne mu ndongamu Wende.

¹¹⁰ Mpindyewu, paakabangaYe kwenza buloba, Wakenza muntu, kadi muntu awu kavwa anu ne mmwenekelu mujaalame menemene to. Mpindyewu twamonu cyôcì aci, mu dinda emu, twàlongù dinaya adi, mushindu uvwa—uvwa Taatù utuuluka ulwa kwela mwn'Ende wa balume dísù, mwenza mu cimfwanyi Cyende, ne bikwabo. Pashiishe Yèyè kumwenzela mukaji, mukwacishi.

¹¹¹ Mpindyewu, nwavulukaayi, ne, bifùkìibwà byònsò bya pa buloba ebi, Adama ngwàkabiinyika mènà.

¹¹² Yèyè ukaavwa mwenze ngo—ngombe, ne nyama, ne bintu byònsò. Kadi leelu ewu, tudi. . . Balondolodi bàà maalu a bikondo ne—ne beena meeji bashiileshiilangane banene baa maalu a mamanya, bàkaadi bateeteete, kukaadi bidimu binunu bisambombo, bwa kujandula dinungu didi dipangike adi, bwa cinyi nyama awu. . . Muntu mmwoyi wa nyama. Tudi bamanye aci, bwa ne tudi benza. . .

¹¹³ Ne mukaji udi anu citùpà cya mulume, cintu cyangata ku cikwabo. Mukaji kavwa mu bufùki bwa ku cibangidilu to. Nzambi ukaavwa mumane kulekela difùka, kukaavwa bidimu ne bidimu ne bidimu, too ne paaluYe kwenza mukaji ku lubadi luumusha mu luseke lwa mulume. Adama ukaavwa mumane kwinyika bifùkìibwà byònsò mènà, bintu bikwabo byònsò, kadi kavwaku cintu to bwende yèyè mwine. Pa nanku, Yèyè kumwenzela mukwacishi; kwangata lubadi mu luseke lwende amu, kujibikila disoso adi, e kumwenzela mukwacishi. Ne muntu mwine, mu nyuma wende amu, uvwa byònsò bibidi mulume ne mukaji.

¹¹⁴ Ne mukaji udi anu ncitùpà cya mulume. Nenku padi mulume usela mukaji, ne yèyè mwikàle menemene mukajende, mukaji mumupa kudi Nzambi, neikale kudiye anu citùpà cyende.

¹¹⁵ Ki bwa cinyi nudi ne bilema búngì cyanaana mu dibaka, mbwalu udi upatuka ukamona mwâna wa bakaji kampana wa mèsù malenga mafiikuluke anyi mèsù a bleu, anyi cintu bu nanku awu, ne mbungakeenu mulenga, peebe umba ufwa bwende yèyè. Musangu wa kumpala udiye anu upeta wende mwâna wa kumpala anyi, mènù awu apooka, wela minyengu ne ukulakaja, pa díbà adi ki wèwè kujinga kumwipata. Ne bamwe baa kunudi nwènù bakaji peenu paudi upetangana ne kânà kaa balume ne tusuki tufinunuja, ne kandundu kaa mafuta kaa mamwèndè kapumwinamu citùpà cijima, ne nsuki mvwangala. Kadi pàabi yònsò ayi's neyituuke; s'ndi mèmè mumanye nanku bwalu nkàadi mupicilemu. Kadi cidì cyenzeka ncinyi? Ncinyi aci? Wèwè peebe umba ufwa bwa biine abi.

¹¹⁶ Bivwa bikengela wèwè kusambila, dyambedi, bwalu mukaji ncitùpà cya ku wèwè. Nenku pawikala mwele mukaji

citùpà mumutwe mu cyâdi cyebe, ne mumwangate bu mukajeebe, ne wêwè... Ûdi ushiya citampi pambidi peebe. Netwâmbè bwalu ebu mushindu ewu bwa nufike ku dyumvwa. Nenku mukaji mukwabo kana yônsò uwatwa mu cyâdi aci kaakukumbananganaku ne citampi aci to. Nenku Nzambi ki wâkwela bujitu abu pambidi. Nenku vulukaayi anu cyôci aci.

117 Wêwè utu wangata mukaji wa bende upatuka nende ne... Mvwa muumvwe bamba leelu ewu bwa mwânà wa bakaji mukwabo mutekete muneemu mu cimenga emu, mwânà mukwate ne bya luse's. Ntu mumumanyè. Kadi munayi kampanda wa twarta twa mfranga ùmusùmbila anu bilâmbâ bilenga bya dikema, ne bikwabo, mwikâle uteeta kwikala kumulobesha mushindu awu. Nkose, udi mufwanyine kwenza cintu bu nanku awu, kêna nansha mwa kubadiibwa bu ne mmuntu wetu ewu to.

118 Nudi bamanye's, mbwa katu ne bushaadile bwa mushindu awu to, cibi nwênù nutu biinyike mbwa mukaji ne "cyena masandi." Yêyè awu's utu ne maalu a nsòmbelu mîmpè kupita cyabibidi cimwe cya bakaji baa mu Jeffersonville. Ne nutu biinyike ngulube mukole mukaji ne "cingendââmàsàndi," kadi pende's kêna... Yêyè awu udi ne maalu a nsòmbelu mîmpè kupita bakaji baa mu Étas-Unis aba, bààbûngi baa kudibo. Aci ncyà bushuwa menemene. Mpindyewu, ndi mumanye ne abi mbya ciipanshi. Kadi nkaavwa munwâmbile ne nênteekè kantu ne kantu pa kaaba kâàkù, ne ndi muswe nucimanye. Ne ncyà bushuwa. Bwônsò bwabo, bakaji baa leelu ewu aba, kî mbamanye nansha cidi maalu a nsòmbelu to. Bakaadi bambambe ne: "Kabyena bintapa ku kondo kaanyi kaa mwoyi to." Ee, wêwè mwine kwêna naaku to. Tangila bîmpè. Eyowa's, mukalenge. Bya bwalu, wêwè ewu's udi mumanye cidi cîmpè ne cidi cibi.

119 Monaayi mpindyewu. Muntu ewu, pààkafùkiibwàye, Nzambi wakaabulula nyuma wende. Nenku Yêyè kwangata katupa ku muntu mulume, mu luseke lwende, kwenza naaku mukaji. Ki pashiishe kwangataYe nyuma wa bukaji, mwine utu wa kwengeleka awu, e kwenzaYe nende mukaji. Ki kwenzaYe mulume mwikâle ne bulume, mupayame.

120 Kadi panudi numona mu—mu—muntu mulume mwikâle ndambu... nudi bamanye's, udilengeja byanza, anyi munutu nucibiikila amu, nzadi ya ku minu; nenku, nudi numona, yinaayi elu luseke ne yitaanu luseke lukwabo, ne—ne mwikâle ufinunuja nsuki uyilaadika; bwa kulama mukana mulekelela kumpala kwende, ne bintu bya mushindu awu; umwe wa ku bânà baa balume baa balenga kwîsù aba. Wêwè mwaneetu wa bakaji, wavùluka anu ne, kudi cintu kampanda cipampalamuke mu nyuunyi awu. Kudi cintu kampanda cipampalamuke. Mbîmpè kwikala ne dîsù ditonona bwa kumudimukila.

¹²¹ Nenku paudi umona muntu mukaji ne mucu wa mfwanka ku luseke lwa mishiku eku, muvwale cinsalabeeta, wamba ne: “Mêmè’s nênkwambilè, mulumyana, nkwambileci patooke!” Mwaneetu wa balume, watapa ntaala wadimuka ne nsongaakaji awu. Kudi cintu kampanda cipampalamuke mu yèyè amu.

¹²² Mukaji, udi ne cya kwikala mukaji, udi ne cya kuvwala bilàmbà bu mukaji. Pààkenzà Nzambi mulume, Yèyè wakamwenza mwikàle cintu kampanda, ne Yèyè wakenza mukaji mwikàle cintu cishìilàngàne. Ne padi Nzambi uvwadika mulume, Wakamuvwadika mushindu kampanda, ne mukaji mushindu mukwabo. Ne Bible mmwambe ne: “Ncinyangu bwa muntu mukaji kuvwala civwalu cidi cikumbanyinà muntu mulume.”

¹²³ Nenku nwènù bakaji, bàdi bavwala tupanu etu ne bikwabo, ne nubivwala pambelu apa, tulumyana twa kale. . . Nutu mene nutubiikila ne ntunganyi’s, tupanu twa tushiikile mu binù atu? Batu ba-. . .? Kaa, ncintu kaayi aci citubo ba-. . .? To, to, kî ntuputulu to, kakwabo aku, tùdi ne mikolo mile munda atu. [Disangisha didi dyamba ne: “Kapanu kaa kashiikile mu mabunda.”—Muf.] Kapanu kaa kashiikile mu mabunda, ne cinsalabeeta, bilàmbà bya dyenza naabi mudimu.

Ubwelamu, bamba ne: “Ebi mbya bainàbànzà.”

¹²⁴ Mêmè kwamba ne: “To, nudi batupakane. Bainàbànzà kabatu bavwala bintu abi to. Bakaji mbadi bafwanyine kubivwala, kadi kî mbainàbànzà to.” Neya bushuwa.

¹²⁵ Bible mmwambe ne: “Ncinyangu bwa muntu mukaji kuvwala civwalu. . . ne bwa muntu mulume kuvwalaye civwalu cidi cikumbanyina muntu mukaji.”

¹²⁶ Ne balume biine bakaadi benda batamba kulwa bilùmaabikàji, ku dituku ne ku dituku, ne bakaji bakaadi benda batamba kulwa ne bulume bwàbùngì. Mbwalu kaayi ebu? Netujandule mu tusunsa tukese emu, ne Bible. Bakaji kabacyena bakaji kabidi to. Bândi nswa kwamba kî nwnènù bakaji beena Kilisto to. Ndi ngaakula bwa nkwaka wa mwasakanaayi ewu. Mbaswe bôbô kwikala benza maalù bu bantu balume; mbaswe kwikala bakosa nsuki yabo bu bantu balume; babandisha cyanza baciteeka pa meesa a cinwinu, mushindu ewu, kadi kwimba musambu wa Nzambi Àbeneshè Àmèrikè, ne mucu wa mfwanka mwasa ku luseke lwa mishiku.

¹²⁷ Bâpweka ne mùsèsèsù, bàpàtuka cyanyimanyima mushindu ewu, kabidi anu mu cibeeba amu. Tuvwa babale. . . Ndi muswe nwnwàmbilèku cintu kampanda. Ne nwènù baakanyeemesha bakaji, teejeaayi. Mêmè ne Billy Paul, mu kampanye kaa ndekeelu kaa eku ne eku kwa ditunga aka, ngondo yisambombo, ndi mulame bùngì bwa bilema bya baakanyeemesha mu njila. Ne pa bilema nkama yisatu, mu njila, nudiku mwa kucinka bùngì bwa bya baakanyeemesha bakaji munkaci amu? Kuvwa

kupangika anu...Dikumi ne citeema baa kudibo mbavwa bantu balume. Nenku nkama yibidi ne makumi mwandamukulu anyi, ngeela meeji ne mmuvwabi, nkama yibidi ne makumi mwandamukulu ne umwe bavwa nanku ne cya kwikala baakanyeemesha bakaji. Baakanyeemesha bakaji! Mpindyewu, ncyêna ngamba ne baakanyeemesha bakaji baa bimpè kabatuku to. Kadi yêyè neatume mashinyi luseke lwônso cyanaana.

128 Kadi udinge anu umwase cilumbu? Yêyè ànjì ikalèku anu bu wa kwisù kulenga, mwimane mwaba awu, mwikàle usaamuna nsuki padi mpulushi wenda useemena apu. “Akaa,” mudiye mufwanyne kwamba’s, “bushuwa, wêwê’s ngudi mu cilema!” Hmm! Katwenaku ne mikenji miine to.

129 Baajaadiki cyôci aci dituku adi mu cilumbu cya citadi mûndi mfuma ku dipicila emu aci. Twêtù katwenaku ne mikenji miine to. Kwôkò kwikàle . . .

130 Kabyena bikemesha to padi bakalenge banene baa Angleterre bambe ne: “Mungalaata mmazuwa menza anu ne bilàmbà bidi bikwata lupeepele kadi kakuyi lwôngò to.” Ncya bushuwa, biimane pa kasheete ka nsabanga, munkaci mwa kudiswisha bwa kubasungulabo. Mungalaata ukaadi mubole, bya mwomumwe ne bamfumu baa cimbàmbilà ne bakwabo bônso. Cintu cyônso mu kaabujima ncibole. Kudi cintu anu cimwepele cidi Nzambi ne cya kwenza, nkubutula cintu cyônso mu kaabujima, bu mwakambaYe ne Yêyè neénzè, kadi kubangulula. Mpindyewu tangilaayi anu numone munukaadi pabwipi ne Dilwa.

131 Mpindyewu pàalu mukaji ewu...Yêyè kwenzela mulume mukwacishi, ne bivwa bikengela bwa kwikalaye mukwacishi wa mulume. Nenku pashiishe . . .

132 Mpindyewu, mwaba awu, mêmè nciitu mwanji kupetaku muyiishi nansha umwe mwikàle witaba cyôci eci to. Kadi bôbò badi bateeta kucivwija mushindu mukwabo kampanda, kadi aci kaciyena cimweka kûndi bu cya meeji to. Badi bateeta kwamba ne Adama ne Eva baakadya bimuma kampanda bya pomes. Mwaneetu, piikalà...Mpindyewu ncyêna ngamba bwalu ebu bwa kuneka to, kadi ndi muswe kubwamba. Bwalu, piikalà kudya kwa bimuma bya pomes kufikisha bakaji ku dijingulula ne badi butaka, s’mbimpè bwa twêtù kubààbanyina cyakabidi bimuma bya pomes. Ne nwênù’s nudi anu bamanye ne aci ncyà bushuwa.

133 Nudi bamanye ne, kudya kwa cimuma cya pomme, kî ncyôci aci cyakenzabo, cyàkabàfikishà ku dijingulula ne bavwa butaka to. Bushuwa, kacivwa ncyôci aci to. Civwa ne cya kufika ku disangila dya mulume ne mukaji. Civwa ne cya kwikala aci, bwalu baakajingulula ne bavwa butaka paakangatabo cimuma cikandika eci. Mukaji katu mucu wa bimuma anyi? Wêwê

kwêna cimuma cya mamwêbè anyi? Ki cyôci aci cimuma civwa cikandikiibwe bwa kwangata.

¹³⁴ Mpindyewu cintu cinene ncyeci. Mpindyewu cidi maalú a mamanya mapeteku ku dimanya dya civwa citambe kwikala ciseemene pamwe ne muntu civwa... Bôbò badi bumbula mifuba ya kale, bangata bishààdilè bya mifuba, bangata mitù, bangata tubalubalu twa mitù, ne maboko, ne mifuba, nenku bateeta kwenza bwa bimweneke bu bifwanangane ne muntu. Paabo's mbamanye ne cintu cidi citambe kwikala ciseemene pamwe ne muntu cikaadibo bafikeku ku dipeta, ciseemenangane nende, nnsòkòmuntù. Yèyè ki nyama wa mushindu udi mutambe kwikala musemene pamwe ne muntu; kadi nansha nanku kêna ne cidiye ciine to pa kutangila mudi muntu, mutambe kubàndila.

¹³⁵ Mushindu wa mwoyi udi mutambe kupwekela ndudimba; mushindu udi mutambe kutumbuka mmuntu. Nzambi wakabangila kwinsi ne wakaya wenda ùbànda, too ne mwakacifikishaYe mu cimfwanyi Cyende. Kubànda naaci kupicila ku nyuunyi ne ku nyama, wenda ùbànda, too ne mwaluYe kufika ku cimfwanyi cya Nzambi. Wàkenza muntu mu cimfwanyi aci. Ki mushindu udi mutambe kutumbuka ngwówò awu. Mushindu udi mutambe kupwekela udi anu civwa cidi cilwe kwandamuka ludimba aci, ne bikwabo.

¹³⁶ Mpindyewu dinungu didi dipangike, didibo kabayi mwa kupeta edi. Tangilaayi Mifundu mpindyewu. Nwênù, nenwikale mwa kubenga cyôci eci, bààbùngì baa kunudi, kadi ndi mèmè muswe... Ndi muswe anu bwa nucilame mu lungenyi. Nenku kanwikadi badyànjlè kudilongolola bwa kucibenga to. Teelejaayi.

¹³⁷ Ndi mumanye ne bààbùngì baa kunudi mbafulume ku diteeleja Ngangabuka DeHaan. Mbushuwa ne mèmè... Yèyè muntu wa cipidi cyende aci, ne mwaneetu mwimpè wa ba-Baptistes, mèmè ndi mmwanyisha bulelela. Udi ne meeji mapite ne bwongo butwe, ne—ne nî mbikwabo bintu kaayi byàbùngì kupita bìndì mèmè mufwanyineku kumanya; bwalu yèyè n'Docteur mu—mu Bunzambi, kabidi ngangabuka mwondopyanganyi, kabidi mwikàle Docteur wa Maalu a mamanya. Mmuntu wa meeji matwe. Kadi ùdi wamba ne abi... Paakamona bânà baa balume baa Nzambi ne bânà baa bakaji baa bantu bavwa balenga kwisù; yèyè udi wangata mmwenenu wa Josèphe, kadi kwamba ne “baa—baakadifinya mu mubidi wa buntu,” ne baakangata bakaji. Nenku kwakiikala bantu baa mpolondo mu buloba bwa Nod. “Nenku baakangata bakaji ne bààkasòmba naabo, pavwa bânà baa balume baa Nzambi, Banjelo badishinde abu, bangate ne bamone bânà baa bakaji baa bantu; ne dijinga dya disangila dya mulume ne mukaji divwa cintu cya cinene menemene, nenku bu muvwabo benze mpekaatu ku didishinda adi, baakadifinya mu mubidi wa buntu.”

138 Bòbò benze nanku awu, badi banyangakaja dyondopa dya kudi Nzambi, badi banyangakaja bikwabo byònsò. Dyabulu yèyè mwa kufùka, s'ùdi mwomumwe ne Nzambi. Dyabulu kèna mwa kufùka to. Ndi muswe undeejeku mwaba nansha umwe udi dyabulu mwa kufùka. Kèna mwa kufùkaku to. Yèyè utu anu unyangakaja bidi bimana kufùka abi. Yèyè kî mmufùki to. Yèyè udi anu munyangakaji cyanaana.

139 Ee, dibà adi, cyàkenzekà ncinyi? Tangilaayi. Wanyi ngumvwijilu nyèyè ewu. Dinungu didi dipangike ndyòdì edi.

140 Mpindyewu mbapete nsòkòmuntù, kadi kwèna mwa kwenza ne nsòkòmuntù asangile ne mukaji wa muntu bwa kulelabo mwàna nansha. Kwèna mwa kusambakaja muntu ne nyama to. Kabyakusambakanaku to. Kwèna mwa kudyelesha mashi a nyama to, nansha yèyè nyama kaayi.

141 Pàmvwà mu Afrika, bavwa benzela bantu bafiike abu maalu mabi be; muntu mukwabo kungambilaye, wamba ne: “S'badi anu nyama yetu eyi menemene.”

142 Mèmè kwamba ne: “Kwàmbi nanku to. Bòbò aba's mbantu anu mùdì wèwè amu, pàmwàpa bakupiteku ne wèwè.” Indilaayi nnwàmbilèku, paudi ne lwidì lwa mushindu awu, wèwè ngudi munkaci mwa kwalukila ku nyama. Mèmè ne: “Muntu mwine awu, nansha mufiike fitutu bu A wa cifitù mu karta kaa dinaya aka, anyi mwenze wa kalaabi bu diwoji, anyi nansha yèyè wa diikala dya bleu wa mufiike fitutu, mmufwanyine kusungila mwoyi webe pa kufila kwa mashi a kukwelabo. Kadi kudidingiku wadyelesha mashi a nyama to.” Ncya bushuwa, mmuntu.

143 Kabyena ne bwalu edi dikoba ndifiike, ne dikwabo ndifiikuluke, ne dikwabo ndya kalaabi, ne dikwabo nditooke, aci kacyenamu ne bwalu nansha bumwe to. Bible mmwambe ne: “Ku mashi amwe Nzambi wakenza bantu bònsò.” Bwa aci ncy bushuwa menemene. Myaba yituvwa basòmbèle, yishintulula meekala etu, kabivwamu ne bwalu nansha bumwe to. Ku muntu umwe—umwe Nzambi wakenza bantu baa matunga ònsò, ku mashi amwe, matunga ònsò anu mwomumwe.

144 Ba-Chinois; muntu wa diikala kèna mwa kwamba mpindyewu, muntu mufiike kèna mwa kwamba mpindyewu, ne: “Muntu wa ba-Chinois wawa, yèyè—yèyè ngwa kalaabi, ncyakwikala nende bwalu” to. Yèyè awu's mmwaneenu. Ne wèwè mutooke kwèna mwa kwamba muntu wa kalaabi anyi muntu mufiike, anyi ewu wamba ewu ne: “Ncyèna neebe bwalu” to. Mmwaneenu. Cya bushuwa menemene.

145 Monaayi, mpindyewu, cyàkenzekà ncyòcì eci. Mèmè ndi ngiitabuujà, ne ndi mwa kucitwa nyama ku mikolo ne Bible ne, nyoka awu ngwàkacyèza. Nyoka awu ki muntu udi mupangike awu pankaci paa nsòkòmuntù ne muntu. Bwalu, teejeaayi, monaayi bwalu ebunye mpindyewu, ne nyoka kavwa nyama wa

udikoka panshi to. Ûwva nyama wa “mudimuke” kutamba nyama yònsò ya mu mpàta.

¹⁴⁶ Mpindyewu, ndi muye kangata nkongamyaku, leelu ewu, ya myaba yònsò, bwa kukeba mwaku ewu, civwa mwaku ewu *mudimuke* umvwija. Ûdi umvwija ne “kwikala ne meeji matwe, kwikala mudimuke,” ne, dyandamuna ditambe bwìmpè dya du—mu cyena Ebelu (mufumine ku m-a-h-a-h, mahah) didi dyumvwija ne “udi ne dimanya dilelela dya mèyi makulu a mu nsòmbelu.”

¹⁴⁷ Mpindyewu twänji tutangilaayi cyòcì eci bwa katanci kakese cyanaana. Yèyè udi ne meeji matwe, mudimuke, kadi mwikàle ubiikidiibwa ne “nyoka.” Kadi, nwavulukaayi ne, yèyè nguvwa cintu cya meeji matambe kutwa civwàku, ne mutambe kufwanangana ne muntu kupita cintu cikwabo kana cyònsò civwa mu mpàta; mutambe kwikala museemene pamwe ne muntu. Kavwa nyama wa udikoka panshi to. Mulawu awu ngwakamuvwija nyama wa udikoka panshi. Kabidi yèyè uvwa . . . Bible udi wamba ne yèyè nguvwa mutambe bulenga ku yònsò ayi.

¹⁴⁸ Nenku nansha mulawu mwine kawakuumusha bulenga bwende bwònsò to; nansha nanku's meekala a butumbi a nyoka mmalenga a dikema, ne ngàsà wende ne budimu bwende abu. Nansha mulawu mwine kawakabyumusha byònsò to. Kadi, nudi bavuluke ne, Nzambi wakamwambila ne mikola yende yivwa ne cya kumuumuka ne yèyè uvwa ne cya kwikala wendela pa difu dyende. Nenku kwèna mwa kusanganaku mu nyoka mufuba nansha umwe mufwanangane ne wa muntu to, nenku ki bwa cinyi maalu a mamanya mmakebe mapange. Kadi's ki yèyè awu.

¹⁴⁹ Nzambi mmucisokoke beena meeji ne badimuke, ne wakalaya bwa kucisokolwela bânà baa Nzambi, mu matuku a ndekeelu piikalà bânà baa Nzambi ne cya kumweneshiibwa, piikalabi ne, “bânà baa Nzambi baa bwena bavwa basanka kumpala mene kwa difùkà dya dyulu ne buloba abu.” Piikalà dibuulula dinene dya Bunzambi ne maalu makwabo mwa kutuuludiibwa mu matuku a ndekeelu, Yèyè uvwa ne cya kumweneshila maalu aa kudi bânà baa Nzambi. S'nudi bamanye ne ki cidì Mifundu yilongesha. Kadi's ki twètù aba. Ki bwa cinyi Nzambi udi munkaci mwa kutukangwila maalu aa. Nzambi udi munkaci mwa kubweja bânà Bende mu dimweneshiibwa. Ûdi uya upita too ne pa mikalu ya dimanya kana dyònsò dya muntu, ùkabwela too ne mu mabuulula a mu nyuma, kadi kuCituulula panshi. Katwenaku balongeshe, mu Bible ewu ne: “Apa mbwa ewu udi ne lungenyi?” anyi? Kî mbyakalongaye mu seminere kampanda to; kadi bidiye mulonge ku binù byende kumpala kwa Nzambi, ne bidi Nzambi muumvwe disanka bwa kumupeesha. Bânà baa Nzambi, bamweneshiibwe!

150 Ki nyoka nyêyè ewu, mpindyewu civwa nyoka ki cyôci eci; mêmè nênnupèeshè dyanyi dimuzola.

151 Tudi ne . . .tudi bapweke kwinsi, ku ludimba, kuya too ne ku civuba aci, nenku kupweka kupweka, ne *cikampanda*, too ndekeelu wa byônsò ne panudi nukafika ku nsoko, ku nsòkòmuntù. Ne patudi tuumuka pa nsòkòmuntù, mpindyewu tutupika tuumuka pa nsòkòmuntù tukafika pa muntu, ki twètù kubanga kudikonka ne mbwa cinyi.

152 “Ee,” mudi maalu a mamanya amba’s, “mpindyewu anji indila! Tudi mwa kusanga mukaji wa muntu ne nsoko ne nsòkòmuntù, ne pashiishe ewu ne ewu, muntu mulume ne nsòkòmuntù mukaji.” Kabyakukumbanaku to. Kuyisanga ne nyama kana yônsò ewu; kabyakukumbanaku to. Mashi kaàkubwelakanaku to; angata mashi ebe wêwè, mmashi mashiilangane anu bikole, bikole menemene.

153 Kudi mashi kampanda pankaci apa, kadi kabeena mwa kupeta nyama awu to. Kaa, Aleluuyah, ngaabangi kuumvwa butendeleedi bumbwela mpindyewu ewu. Monaayi. Bwa cinyi? Nzambi mmubasokokeci. Kakwenaku mufuba mu nyoka ùdi mufwanangane ne mufuba wa muntu to. Mmuteeke cintu aci kule menemene mu mushindu wa kacyi mwa kusokolodiibwa kudi bantu baa meeji matwe abu to.

154 Nenu nênnùleejè kudi muntu wa meeji matwe awu mufumine, mwaba—mwaba udiye usanganyiibwa, nansha bya munyi. Nudi numona’s, yêyè kêna mwa kuvwila ku aci to.

155 Cidi ne cya kulwa ku dibuulula: “Wêwè udi Kilisto, Mwânà wa . . .” “Pa lubwebwe elu Nêngibakilèpu Ekeleeziya Wanyi; ne biibi bya iferno kabyena mwa kumutamba bukole to,” dibuulula dya mu nyuma. Mmunyi—mmunyi mwakamanya Abele mwa kulambula mwânà wa mukooko, pamutu paa Kaayina wâkalambula yêyè bimuma bya mu mpàta? Cyakabuuludiibwa mu nyuma kudiye. Kwêna ucipetela ku ma-seminere to. Kwêna ucipetela ku mangumba to. Udi ucipetela ku Dyulu.

156 Mpindyewu tangilaayi nyoka awu, nyoka uvwa ku cibangidilu ewu. Twânjaâyikù kumuzola mpindyewu. Yêyè nnkozongù munene menemene wa mpolondo. Udi pankaci paa nsòkòmuntù ne muntu. Nenu, nyoka awu; dyabulu, Lucifer, uvwa mumanye ne ki mashi amwepele avwa mwa kubwelakana ne mashi a muntu aa, muntu umwepele uvwaye mwa kukwata nende mudimu. Kavwa mwa kukwata mudimu ne nsòkòmuntù to, awu mashi kaàvwakù mwa kubwelakana to. Kavwa mwa kukwata mudimu ne bintu bishiileshiilangane ebi to. Kavwa mwa kukwata mudimu ne mukooko to. Kavwa mwa kukwata mudimu ne kabalu to. Kavwa mwa kukwata mudimu ne nyama kana yônsò ewu to; bivwa bikengela bwa kukwataye mudimu ne nyoka ewu.

¹⁵⁷ Twǎnjì tumwangataayibi mpindyewu tumone ne mmufwanangane ne cinyi. Yêyè nkozonǵu munene menemene wa mpolondo, muntu wa mpolondo wa kalekale ne kalèlèlà. Kwòkù aku ki kudibo bakasangana mifuba minene eyi, ne mèmè nènnùleejè cyòci eci mu Bible. Mpindyewu tangilaayi ne ntema yònsò. Eyo. Nkozonǵu munene menemene wa mpolondo ewu, twǎnjààyibi kwamba ne ùvwa—ùvwa bule bwa mètres asatu, ne makaaya manene maalabale; mufwanangane anu ne muntu menemene. Nenku mashi ende, paanyima paa yèyè mumane kupweka, basange nyama ne mukwabo; udi mwa kusanga nyama; nenku byakatungunuka ne kwenda kupeta mashi matambe kubàndila, mushindu mutambe kubàndila wa mwoyi, mushindu mutambe kubàndila, too ne mudibi bikabwela mu cipaapu cya muntu. Kadi ditwangana dya ndekeelu mwaba ewu, dya pankaci apa edi, dyakakoseka. Mbanganyi badi bamanye ne maalu a mamanya kaena mwa kupeta dinungu didi dipangike? Nwènu bònsò nudi bamanye aci. Bwa cinyi? S'ki yèyè ewu, nyoka awu. Ki yèyè uvwaku ewu, nkozonǵu munene menemene wa mpolondo awu.

Nenku dyabulu udi upweka, mpindyewu, wamba ne: “Mèmè ndi mwa kufila disonsodiibwa.”

¹⁵⁸ Mpindyewu, wèwè mubange kwikala utangila bakaji ne mushindu wa dyanza wa bakaji, uvuluke ne, udi mulaaba kudi dyabulu (bwalu mwine awu kî mmukajeebe wèwè to).

¹⁵⁹ Monaayi, mpindyewu, dyabulu ngwâkatùùluka kadi kubwela mu nyoka. Nenku kupetaye Eva mu budimi bwa Edena, butaka, ki kwasaye bwalu bwa cimuma civwa munkaci mwa budimi. *Munkaci* mbwena kwamba ne “pankaci,” ne bikwabo; nudi bumvwe's, mu disangisha dya bantu basambakane. Ki yèyè kwamba ne: “Mpindyewu, cidid cyenza disanka. Ncilenga ku mèsù.” Cyakenzaye ncinyi? Wakabanga kwenza mananga ne Eva, ki kushaalaye nende, bu bayende.

¹⁶⁰ Nenku kumonaye ne civwa cyenza disanka, ki kuya kambilaye bayende, kadi ukaavwa mumane kwimita difu, dya Sataana.

¹⁶¹ Ki kulelaye mwanende wa balume wa kumpala, dîna dyende uvwa Kaayina, mwànà wa Sataana.

“Mpindyewu,” mùdi wèwè wamba, “aci ncyà mafi.”

¹⁶² Eyo, netujandule ne ncyà mafi anyi kî ncyà mafi. “Nenku Nènteekè lukuna pankaci paa Dimiinu dyebe ne dimiinu dya nyoka.” Cinyi? Dimiinu dya nyoka! Mukaji uvwa ne Dimiinu, ne nyoka uvwa pende ne dimiinu. “Ne Yèyè neakuzaaze mutù, ne wèwè neuMuzaaze cikankanya.” Nenku *kuzaaza*, mwaba awu, mbwena kwamba ne “kwenza Difuta dya cibawu.” Mpindyewu's ki “dimiinu” dyenu dya nyoka ndyôdi adi.

Mpindyewu, monaayi, ki bantu babidi aba bapatuka.

163 Mpindyewu, nyoka ewu, paakimanaye mwaba awu, nkozongù munene menemene wa mpolondo ewu mwimane mwaba awu, wakapeta dipiila dya kwenda kwa masandi ne mukaji wa Adama. Mpekaatu udi usanganyibwa penyi leelu ewu? Cidi cyenza ne maalu ikale mushindu udiwu leelu ewu ewu ncinyi? Mpindyewu, mêmè—mêmè... Ncya bushuwa ne nudi mwa kuumvwa cîndî munkaci mwa kwamba eci. Nenku ki cyôci civwàku aci.

Nenku paakenzaye nanku, Nzambi kwamba, kubanga kubiikila Eva ne Adama.

Ki ewu kwambaye ne: “Mvwa butaka.”

Ki Yèyè ne: “Wàkwambîdi ne udi butaka nganyi?”

164 Ki kubangabo, mushindu utubi mu cilwilu cya basalaayi amu, batupwilanga cilumbu. Yèyè ne: “Ee, mukaji ûdi Wèwè mumpe, ki wenji ewu. Yèyè ngudi mufike ku dintwisha.”

165 Ki mukaji wakamba ne: “Nyoka ngudi mumpe cimuma cya pomme” anyi? Eyo, muyiishi, pinganaku mu wèwè’s.

166 Wàkamba ne: “Nyoka ngudi mungambishe.” Nudi bamanye cidi *kwambisha* kuumvwija? Cidi cyumvwija ne “mukooyisha.” Mu...yèyè mukaji...ny-...dyabulu kaakamupaku cimuma cya pomme to. “Nyoka ngudi mungambishe.”

Ki pashiishe mulawu kulwawu.

167 Yèyè ne: “Bu mùdi muteeleje nyoka pamutu paa kuteeleja bayeebe, wèwè wàmanyi kuumusha Mwoyi pa buloba. Nenku neu—neuvudije tunyinyinga twebwe; ne diimita dyebe nediikale kudi bayeebe,” ne bikwabo.

168 “Nenku wèwè bu mùdi muteeleje mukajeebe, pamutu paa kunteeleja Mêmè (Ndi mukwangate ku lupwishi; mushindu udi mutambe kwikala mutumbuke awu), ku lupwishi nkùdi upingana.”

169 “Nenku, wèwè nyoka, bu mùdi mwenze nanku, mikolo yebe yidi yijimina. Pa difu dyebe mpawendela, matuku ebe ônsò a mwoyi. Ne neukinyibwe. Ne lupwishi ki cîikalà cyebe cyakudya.” Ki bwalu mbwôbù abu’s. Ki dinungu didi dipangike ndyôdi adi.

170 Mpindyewu ki Kaayina ulwâlwa ewu. Tutangilaayi ngiikadilu ayi. Ki Kaayina ulwâlwa ewu. Yèyè udi cinyi? Mmwena kantu-ku-byanza wa budimu. Ûdi udima madimi. Wa meeji matwe, wa luumvu lukole; mutendeleedi, mutendeleedi wa dikema; tangilaayi byende—tangilaayi byende byambiibwa mpindyewu. Anji tentemukaayiku pamwe naanyi bwa tukwabo tusunsa tukese cyanaana.

171 Ki yèyè ulwâlwa ewu. Mmudimanye mudiye ne maalu mîmpè a mu nsômbelu. Mmuswe kwikala kuya mu ekeleeziya. Ûdi udiibakila ekeleeziya, udikebela mulambu. Ûdi utwala

cyoshelu, ne byônsò abi. Wibaka cyoshelu, ùtèèkapù bilongo. Utèèka budimi . . . bimuma bya mu budimi, ùbilàmbula Nzambi. Kwambaye ne: “Mbyôbì abi, Mukalenge. Ndi mumanye ne tuvwa badye bimuma bya pommes, ki cyàkabundà cilumbu.” Bamwe ba ku ndelenganyi yende’s badi ne mmwenenu wa mushindu umweumwe awu. Bileeja kudici cifume. Kutwalaye bimuma byende bya pommes abi, bipoola mu budimi, kubiteekaye mwaba awu, kwambaye ne: “Eci necifute cibawu.”

Nzambi kwamba ne: “Kacivwa bimuma bya pommes to.”

¹⁷² Kadi, ku dibuulula dya mu nyuma, Abele kumanyaye yêyè ne civwa mmashi. Ki kulwaye ne mwânà wa mukooko, kumukosaye muminu, ne kufwaye.

¹⁷³ Ki Nzambi kwamba ne: “Aci ki cya bushuwa. Ki cidi cyenze bwalu abu. Civwa mmashi.” S’nudi bamanye mashi àndi ngamba awu. Eyo. “Mashi ki akenza bwalu abu.”

¹⁷⁴ Tangilaayi mpindyewu. Ki pashiishe paakamona Kaayina ne mwanaabo munsantu mubunguluki wa mu malaba awu wakiitabuujiibwa kumpala kwa Nzambi, ne bimanyinu ne maalu a kukema bikaavwa anu byenzeka kuntwaku, yêyè kumuumvwila mukawu. Kwambaye ne: “Netwimanyike cintakanyi eci anu mpindyewu ewu.” Tangilaaayi numone bânà baabo baa balume, tangilaayi numone bânà bende, too ne lelu ewu. “Mpindyewu, mêmè’s ngutu ne meeji matwe kumupita yêyè,” ki kupetaye cijji. *Cijji* cyakafuma penyi? Nudi bafwanyine kwamba ne cijji . . . ? Yêyè kushipa mwanaabo. Ûvwa mushipyanganyi.

¹⁷⁵ Nwênù nudiku bafwanyine kubiikila Nzambi ne mmushipyanganyi anyi? Adama pende nyawu uvwa mwânà wa Nzambi. Bible ngudi mwambe ewu, ne: “Adama uvwa mwânà wa Nzambi,” ku cibangidilu cikezuke aci kuntu kwaka. Adama uvwa mwânà wa Nzambi. Nenku mukawu awu ne lukuka alu, ne byônsò abi, kabivwaku mwa kupatukila mu musulu mukezuke awu nansha.

¹⁷⁶ Bivwa ne cya kufumina mu mûngà mwaba. [Citupa cya mukaba wa mēyì munda mutupu—Muf.] Nenku byakafumina kudi Sataana, uvwa mwikàle mushipyanganyi awu, anu kwine kwônsò aku. Bible mmwambe ne: “Yêyè uvwa mwena mashimi ne mushipyanganyi, anu kwine kwônsò aku.” Ki bwalu mbwôbù abu’s. Ne yêyè wakashipa mwanaabo.

¹⁷⁷ Nenku civwa ncimfwanyi cya lufu lwa Kilisto. Pashiishe, mu cyôci aci, mu bushuwa bwa bwalu, Yêyè kujuula Sete bwa kwangataye kaaba kende. Lufu, dijiikiibwa, ne dibiika dya ku lufu dya Kilisto.

¹⁷⁸ Nenku tangilaayaaku, pashiishe, ki bantu beenu baa mpolondo bâlwalwà aba. Pashiishe Kaayina kuyaye ku buloba bwa Nod. Piikalabi ne tatwëndè uvwa nkozongù munene menemene wa mpolondo, Kaayina uvwa mufwanyine kwikala

mufwanangane ne cinyi? S'ne tatwëndè. Kuyaye ku buloba bwa Nod, ne yêyè kwangataye umwe wa ku bânà baabo baa bakaji.

¹⁷⁹ Mushindu umwepele uvwaye mwa kwenza. Kakwena bakwabo bakaji badi bafwanyine kulwa to, anu balwile kudi Eva. Badi bamba ne baakalela bânà baa balume ne baa bakaji makumi mwandamutekete. Bu ne kakuvwa mukaji to . . . Bible katu ubala bakaji padibo balediibwa to, anu balume. Nenku piine apu, bu ne kakuvwa mukaji mukwabo pa kuumusha Eva, paakafwaye, bukwabantu bwakiimana's. Ûvwa ne cya kwikala mulele bânà baa bakaji. Ne yêyè uvwa ne cya kusela mwanaabo wa bakaji menemene.

¹⁸⁰ Yêyè kuya ku buloba bwa Nods e kwangataye—e kwangataye mukajende awu. Nenku paakamuselaye kwine aku, kwòkù aku nkwapetabo bantu banene menemene baa mpolondo abu, bàvwà biikàle bânà baa Nzambi badishinde; bàakafùminà ku tatwàbò awu, dyabulu, kupicila kudi Kaayina. Ki dinungu dyenu didi dipangike ndyôdi adi.

¹⁸¹ Nenku tangilaayi dimiinu dya nyoka adi. Mpindyewu tangilaayi. Vulukaayi ne, dimiinu dya nyoka ditu ditendeleedi. Tangilaayi mudidi dibanga kutentemuka mpindyewu, bwa tusunsa tukese. Ki dyôdi diyaayà edi, dimiinu dya nyoka adi. Cyàkabènzekelà bôbò abu ncinyi? Mpindyewu ndekelaayi mbale anu cintu kampanda mwaba ewu, cîndì mufume ku difunda mu mapingaja emu.

¹⁸² Cidì cilwile mu ndelanganyi ya Abele ncinyi? Telejaayi eci. Eyo. Paanyima kulwaku Abele. Paanyima paa Abele kulwaku Sete. Paanyima paa Sete kulwaku Noa. Paanyima paa Noa kulwaku Sem. Paanyima paa Sem kulwaku Abraham. Paanyima paa Abraham kulwaku Izaka. Paanyima paa Izaka kulwaku Yakobo. Paanyima paa Yakobo kulwaku Yuda. Paanyima paa Yuda kulwaku Davidi. Paanyima paa Davidi kulwaku Kilisto, ku bupwangane.

¹⁸³ Tangilaayi kalekale wawa mwàkasòmbelà Nyuma wa Nzambi munda mwa Abele. Tangilaayi mwàkasòmbelàYe munda mwa Sete. Tangilaayi mwàkasòmbelàYe munda mwa Yuda. Tangilaayi mwàkasòmbelàYe munda mwa Davidi. Tangilaayi Nyuma umwèumwè awu muvwaye ubiikila, ubiikidila mu dimiinu dyakane adi, too ne kundekeelu. Civwabo benze nansha ciikàle cinyi, bavwa badyanjila kulongolola.

¹⁸⁴ Tangilaayi Yakobo, mukooyike. . . Ncyèna ngamba eci bu dinyangakaja dya cijila to. Kadi Yakobo, kenji kaa maalu makonyangale aku, kacya anu kaalembelèla dîbà dyònsò kwînshi kwa mapuupila a mamwàku; kiikàle kanyee makana eku ne eku, kaacilùmaacikàjì. Kuvwalaye bintu pambidi, kuya kadinga tatwëndè, bwa kupetaye dibenesha adi; kadi dikaavwa dimana kumupa anu kwònsò aku kumpala kwa difùkà dya dyulu ne buloba. Cya bushuwa, ki mudibi.

185 Kupatuka kwaka kadi kudinga tatwëndè-mwenu; wangata tuumici twa makejimakeji, tuumici twa cilombalomba, kutwasaye mu mâyì, bwa kuciinyishaye ngombe ayi pavwayi yimita mafu; bwa kuyifikisha ku dilela twànà twa makejimakeji, bwa wamona mwa kwibila ne kwangata ngombe ayi. Nzambi wakamubeneshila mu ciine aci. Ncya bushuwa.

186 Mulawu wikale kudi ewu yònsò wadidinga kwamba cintu kampanda bwa Yakobo. Nudi bamanye—nudi bamanye civwa muprofeta wa mashimi awu mwambe. . . Anyi, uvwa wenza ciprofeta anu cya bushuwa eci. Baalama, kwambaye ne: “Ewu yònsò udi umubenesha neabeneshiibwe, ne ewu yònsò udi umwela mulawu neèdiibwè mulawu.”

187 “Ntu munwängate nwênù, Yakobo. Ndi mumusangane bu. . . bu mu buloba bwenyi. Ne anu mudi mukanku usaasuluja diswa dyawu, ngâkamusaasuluja e kumupatula.” Aleluuyah! “Kakuyi ku bukole to, kakuyi ku makanda to, kadi ku Nyuma Wanyi, mudi Mukalenge wamba.”

188 Tangilaayi mudi cyôci aci cipweke cyenda ciya too ne ku bupwangane abu. Nyuma awu mmwenze mudimu wenda upweka too ne ku bupwangane mu Kilisto, mupweke wenda upicila mu yònsò wa ku Bankambwa, mwikàle anu upweka. Cívwabo benze nansha ciikàle cinyi, civwabo bambe, civwabo benze, kakuyi mpatà to bavwa dimiinu dya mwakane.

189 Nenku, apa, pavwa mwakane Abraham. . . Butumbi’s we! Kaa, kadi ngaavu kudyumvwa bilenga be. Mwakane Abraham paakatuutakeenaye ne Melekisedeke, Mwine uvwa Nzambi Yèyè mwine awu’s!

190 Melekisedeke uvwa nganyi? “Mfumu wa Salema, udi Mfumu wa Yelusalema, Mfumu wa ditalala. Kayi taatù. Kayi maamù. Kayiku ne ntwadijilu wa matuku, anyi ndekeelu wa mwoyi to.” Nansha Yèyè mwikàle Nganyi, Yèyè uciidi anu ne mwoyi. “Kacya kayiku mulediibwe. Kaadyakufwaku to. Kacya kayiku ne taatù anyi ne maamù. Kacya kayiku ne ntwadijilu wa matuku, anyi ndekeelu wa mwoyi to.” Ngambilaayi ne uvwa Nganyi. Nzambi wa Cyendeleele; mu citudi twètù tubiikila ne. . .

191 Kaa, nyewu ngäpù mwoyi mpindyewu munutu mene nwênù nubiikila cyôci aci’s. Tèòfàni, ki cyôci aci. Anu bu mudi. . . Kî mbwalu bukatakaja to; kadi paaci’s cidi anu cintu kampanda cimweneshiibwe. Mushindu wakalwaYe kwa Abraham mu ntenta kuntu kwaka, bu mwanjelo, e kwamba ciprofeta, kwambila Sarah mwakasekaye, paanyima Pende, ne bikwabo. Cintu aci, cintu cimwecimwe aci.

192 Nenku’s ki Yèyè ewu uwaku awu. KutuutakeenaYe ne Melekisedeke. Nenku kakwën-. . . Abraham tatwëndè wa kakwëndè, mu dimiinu dya mwakane, kufutaye byadiikumi kudi Melekisedeke; nenku cyôci aci cyakabadiibwa bwa mwikulu wa mwikulwende, dimiinu dya mwakane.

193 Mpindyewu ki dimiinu dya—dya nyoka dilwalwà edi. Mpindyewu, vulukaayi ne, nekwikale lukuna, mvita pankaci paabo.

194 Dimiinu dya nyoka padidi difika, nenku didi dipatula cinyi? Mpindyewu twangataayi ndambu wa bidimu bya ntwadijilu. Mpindyewu tangilaayi cidi cyènzekà kwòkò aku. Netucibale too ne kwinshi, bwalu ndi mfuma ku dicikenketa. Dimiinu dya nyoka dyakapatula Kaayina. Kaayina kuya ku buloba bwa Nod, kupatula bantu baa mpolondo, ki kulwabo ku buloba bwa Noa.

195 Bavwa ne meeji matwe, balonge tulaasa, bantu baa luumvu lutwe. Ncya bushuwa anyi? Bavwa biibaki, basokolodi baa bintu bipyabipya, beena maalu a mamanya; kabiyi ku dimiinu dya mwakane to, kadi ku dimiinu dya Sataana, nyoka. Bavwa bantu baa bu mudi—bu mudi beena maalu a mamanya, ne biibaki, ne bantu banene, balongeshanganyi. Ki mudi Mufundu wamba. Bavwa batuuta cyamu cya kabanda. Bavwa batuuta cyamu cifiike. Bavwa batuuta byamu. Bavwa bajandula bintu bipyabipya. Bavwa bakolesha byamu bya mishindu mishiileshiilangane, biibaka nzubu, ne bikwabo. Ki mudi Mufundu wamba. Ne bavwa baseki baa Dimiinu dya mukaji, Noa, mwakane. Ncya bushuwa anyi?

196 Twänjààyi kubalonda ntanta tǔng. Pashiishe, tudi naabo too ne ku bwâtù, kwakabutudiibwa bintu byònsò aku. Bakaavwa babwele mu mushiki wa mpekaatu webe wa eyo, ne bôbò ki bàkaavwà bangate bukookeshi, ne meeji matambe kutwa ne lungenyi. Too, ne paalu Nzambi kutapa dísù pa buloba, kakuciyi kushaale bantu bààbúngì menemene to, ki kwangataYe anu Noa ne famiye wende mu bwâtù, kulokeshwa mvula ne kubutula cintu cyònsò nkòòng. Ùkaavwa mumane kwambula Enoka, kumpala kwa dîbà. Ncya bushuwa anyi? Muvwa dimiinu dyònsò, dimiinu pamwe ne dyònsò; kadi bivwa bikengela bwa kiipacila Kende kakumbane.

197 Mpindyewu, Noa ne bânà bende baa balume, baa bwena bààkapàtukà abu, Ham, Sem, ne Yafete, baakapatukila mu ndelanganyi mwakane abu.

198 Dimiinu adi dyakapita dyamwamwa mushindu kaayi? Dimiinu adi dyakabwela mu bwâtù, anu mwakabweladi ku cibangidilu amu, dibwelele kudi mukaji, bakaji baabo abu. Bôbò ki bààkatwàlà dimiinu dya Sataana, kupiciladi mu bwâtù, anu mushindu wàkambulà Eva dimiinu dya Sataana, bwa kulelaye Kaayina, kupicila kudi mukaji.

199 Nwênù nudi nupicisha bakaji biine abu mu byambilu byenu bu bayiishi, Bible pende mwikàle uciipiisha! Pòlò wakamba ne: “Muntu yêyè udyambidila ne mmuprofeta, anyi nansha mene ne ngwa nyuma, ajingulule ne bìndì mêmè mfunda ebi mmèyi matuma a Mukalenge; kadi yêyè mwikàle mupangi, ashaale mene anu mupangi nanku.”

²⁰⁰ Ki cyàkenzà ne mêmè mpatuke mu ekeleeziya wa ba-Baptistes lwà kwinshi eku ncyòci aci. Mwaneetu Fleeman uvwa mwaba ewu kukaadi mutanci; ngeela meeji ne yêyè uvwapu diloolo diine adi. Docteur Davis wakamba ne: “Wêwè ki wíkala mwa kwimana mwaba ewu bwa kujidila bakaji abu bayiishi.”

Mêmè kwamba ne: “Ncyakucyenzaku to. To, nansha bya kumona lufu.”

Yêyè ne: “Ee, kadi’s nênkwapàtè.”

²⁰¹ Mêmè ne: “Batu bakaadi bangiipate mu myaba mîmpè mitambe ewu.” Mêmè ne: “Dìyì dya Nzambi’s ndyòdi edi, Didi dipiisha cintu aci. Nenku mêmè ncyèna mwa kutwa nyama ku mikolo cidi Nzambi upiisha nansha.” To, mukalenge.

²⁰² Bònsò badi bacyenza abu, bidi bileeja ne mbalongeshi baa mashimi, baprofeta baa mashimi. Bible mmwambe ne cyòci aci nciikalabo. “Nebaseswishe ne basungula mene bu ne bivwa mwa kwenzeka.” S’ki bwalu mbwòbù abu.

²⁰³ Monaayi eci mpindyewu. Nenku mwômò amu, dîbà adi, mwakapatuka Ham, Ham ne mukajende, ne bakwabo. Yêyè mulawu wakamulandala. Kudi Ham kwakafuma Nimrod, wâkiibaka Baabulona awu. Mu Baabulona mmwàkapàtukilà ekeleeziya wa Katolike, mbangilu wende. Kulwabi kupicila mu Aakaba. Kuumukilabi ku Aakaba, kubwelabi mu Yudaasa Mpongoloki; bibànda too, ne mu mufwilakanyi ne Kilisto.

²⁰⁴ Nenku mu matuku a ndekeelu aa, nyuma wa mufwilakanyi ne Kilisto ne Nyuma wa Kilisto’s nyòyì eyi. Nyuma wa mufwilakanyi ne Kilisto, wamba ne: “Matuku a bishima akaadi mamane kupita.” Nyuma wa Kilisto, wamba ne: “Yêyè udi umwèumwè awu makeelela, leelu, too ne kashidi.” Nyuma wa mufwilakanyi ne Kilisto udi wamba ne: “Kabyena ne dishiilangana to nansha bakubatiize mu ‘Taatu, Mwânà, Nyuma Mwîmpè,’ bakupòngòlwèle mâyì pamutù, bakumyamìne, anyi nî ncinyi cyònsò, bidi byumvwija anu cintu cimwecimwe aci.” Bible mmwambe ne Nzambi kèna mwa kupangila, ne Yêyè kèna mwa kushintulukaku to. Uwakwacila mudimu ki nganyi? Abu budi anu mbwebe.

²⁰⁵ Mpindyewu udi wamba ne: “Badi mwa kusòmba pamwe anyi? Nyawu wambi, ne, mu bwâtù amu, Mwaneetu Branham, nuvwa ne bònsò babidi Ham ne Sete.” Ncya bushuwa, ncya bushuwa menemene. Ham uvwa mubi. Sete uvwa mutendeleedi ne mwakane. Eyo.

²⁰⁶ Twânjàayi kulonda Ham. Eyo, mpindyewu, kudi Ham ne Sete mu bwâtù bumwe abu; umwe mwakane, ne mukwabo mubi. Kuvwa cikololo ne nkuci mu bwâtù bumwebumwe abu. Kuvwa Yudaasa ne Yesu mu ekeleeziya umwe. Kuvwa mufwilakanyi ne Kilisto ne Nyuma Mwîmpè mu ekeleeziya umwe awu.

²⁰⁷ Nenku, leelu ewu, nyuma yimweyimwe ayi yidi yikwata mudimu. “Biikàle ne cimwenekelu cya difwana dya Nzambi, batendeleedi baa dikema, kadi biikàle ne cimwenekelu cya difwana dya Nzambi kadi bavila Bukole bwadi; kùdì baa nanku awu umuka.” Nyuma Mwîmpè, wamba ne: “Yesu Kilisto udi umwèeumwè awu makeelela, leelu, too ne kashidi.” Luseke luwasungula ki lwèpì?

²⁰⁸ Mufwilakanyi ne Kilisto udi wamba ne *Ewu* mmukanda wa twitabaayi cyanaana. “Twètù netwikale twambulula anu Twitabaayi wa Bapostolo.” Ndi ngeela muyiishi kana yònsò kadyombo bwa kundeejaye mwaba udi Twitabaayi wa Bapostolo usanganyiibwa mu Bible ne: “Ndi ngiitaba Mvidi Mukulu, Taatù Wa ngulu yònsò, Mufùki wa dyulu ne buloba; Yesu Kristo, Mwan’Ende. Ndi ngiitaba Ekeleeziya Munsantu wa Katolike wa Roma, bwobumwe bwa bansantu.” Ciine aci nudi nucipetela penyi mu Bible? Kadi nansha nanku nutu anu nucyambulula mu ekeleeziya yenu minene ya ba-Méthodistes ne ba-Baptistes ayi. S’ndilongesha dya dyabulu, ne baprofeta baa mashimi mbadi badilongesha abu.

²⁰⁹ Nenku ndi ntekemena ne ncyèna nnutapa ku mwoyi to, kadi ndi munkaci mwa kucipoopela musonso bwa tabernacle ewu. Nwènù mwaba ewu mu Branham Tabernacle, nudikande ku bintakanyi bya mushindu awu abi. Cintu cyònsò cidi ciitabuuja mu bwobumwe bwa bansantu aci nditendeleela dya bakishi. “Kudi mutwangaji umwepele pankaci paa Nzambi ne bantu, ne mwine awu m’Muntu Yesu Kilisto.” Nansha kwòkò kwikale ba-Mariya búngì kaayi!

²¹⁰ Nudi numona mwàkenzà dimiinu dya mukaji adi kwaka anyi? Nudi numona mwàkangaciibwà dimiinu dya mukaji adi kupitadi luseke lukwabo anyi?

²¹¹ Tangilaayi leelu ewu, mu Amerike. Amerike ndimiinu dya dyabulu. Ncinyi? Nditunga dya mwànà mukaji. S’nukaadi bumvwe ne: “Ebu buloba mbwa mwànà mukaji.” S’ncyà bushuwa. S’nditunga dya mwànà mukaji. Bòbò’s ki badi baleeja dikàsà.

²¹² Mvwa muye kuntweku, anu abidi adi panshi aa, mu Suisse. Bakaji bamba ne... Mukaji mutekete, mûle tente ne Nyuma Mwîmpè kwambaye ne: “Udi mumanye’s, mêmè muye mu Amerike, badi bamba ne bakaji badi ne budishikaminyi.”

²¹³ Mêmè ne: “Imana nkwambile kudi ciine aci cikafikisha.” Ki mêmè kubanga kumulondela.

Yèyè ne: “Kaa, luse we. Ncyèna muswe bya nanku to.”

Mêmè ne: “Ki kudici cikafikisha nkwòkù aku.”

Nudi bamanye’s, bòbò kabeena benza maalù kuntwaku mudibo benza muneemu emu to.

214 Ncinyi ciine aci? Imanaayi nnuleeje ne Amerike mmwânà mukaji. Pa binjanja byetu bya mfranga padi cimfwanyi cya muntu mukaji. Cintu cyônsò muneemu emu cidi anu mmukaji.

215 Ngambilaayi tûng, kakwena binwinu bya maala a kapya bûngî bukumbane mu ditunga emu, bidi bifwanyine kwikala ne. . . Nudi nuteeka binwinu bya maala a kapya makumi anaayi mu cimenga eci, kadi nuteeke ndumba yisatu, bakaji balenga kwîsù bātu benda bajeekeja nyima mu mûsèèsù abu; nebatume misuuka mipite bûngî mu iferno, bîikalà mwa kubâalakana abu, kupita binwinu bya maala a kapya byônsò binudi bafwanyine kuteeka mu cimenga eci abi. S'ncya bushuwa menemene.

216 Nganyi mwine awu dîbà adi? S'mmukaji. Yêyè udi cinyi? Yêyè ki udi nzambi wa Amerike.

217 Angata bamwe baa ku banàyi ba mu sèndèmâ aba; badi bajuuka mwaba ewu babwela mu mabaka misangu yinaayi anyi yitaanu, biikàle basòmbe ne balume basatu anyi banaayi bashiilangane musangu umwe; ne bimwe bya ku bikandakanda ebi bibaleeja ne byamba maalu abo, babakwata fôtô ya biikàle butaka pambelu apa. Kadi nwênù nsongaakaji mitekete nujuuka peenu nwangata ciine aci bu cileejilu cyenu, (bwa cinyi?) bwalu mamwèbè ukààvwa mukudyanjidile awu, pàmwàpa, anyi kakwèbè mukaji ukààvwa mukudyanjidile awu. Nudi numona mwaba udi dimiinu dya nyoka adi dikwacila mudimu anyi? Ncya bushuwa, ndyôdi.

218 Nenu ndyenze cinyi? Piikalabi ne bubi bavwa ne cya kubunyooka too ne ku nkongo dikumi ne yinaayi, cikondo cya mikenji ya Mòsà, bubi nebwikale bishi bu bwòbù mwa kunyookiibwa mu dituku edi, mudi dimiinu dya mwakane dikaadi bu dishepekete emu? Ne Nzambi wakamba ne nekulwe cikondo, cya Yêyè kayi mwipidije mudimu to, kî nkufwanyine kushaala nansha dimwe to. Tudi ku cikondo cya kunshiikidilu. Ndaayi nwenda nukebangana ne baakane diloolo edi; ndaayi eku ne eku mu bimenga!

219 Kaa, udi usangana bidimba bya ekeleeziya biikàle ne lulamatu lwa dikema kudi ba-Baptistes ne ba-Presbytériens, ne bikwabo, ne mwabo mwônsò. Kadi kabayiku bwalu ne Nzambi to anu mudi kalulu kakayi bwalu ne divwala dya bisabaata bya nêjè. Kabayiku bamanye kantu nansha kamwe pa Cyôci aci to! Cyônsò cidibo bamanye: “Udi mwena Kilisto anyi?”

“Mêmè ntu Katolike.”

“Udi mwena Kilisto anyi?”

“Mêmè ntu Baptiste.”

“Udi mwena Kilisto anyi?”

“Mêmè ntu Presbytérien.”

“Udi mwena Kilisto anyi?”

“Mémè ntu mwena Mpenta.” Aci kacyenaku ne dipetangana nansha dikese ne Cyôci aci to.

²²⁰ Udi mwena Kilisto bwalu Nzambi, ku ngàsà Wende, ùdi ukusungila. Ne wêwè mwine muCimanye. Ne cintu kampanda ncishintulule nsòmbelu webe, byenza ne wêwè ukààdi ne nsòmbelu mushiilangane. Ne ukààdi muntu mupyamupya ne cifùkiibwà cipyacipyà mu Kilisto Yesu. Cya bushuwa’s.

²²¹ Kadi nudi numona kùdì dimiinu dya nyoka anyi? Dimiinu dya nyoka civwa ncinyi? Masandi. Nudi nulonda anyi? Masandi ne Eva. Cyàkenzekà ncinyi ku ciine aci? Cyàkatwàlà cyôci aci ncinyi? Cikaadi cinganyi diloolo edi?

²²² Anji tangilaayi paanyima pààpa, kukaadi bidimu, pààkapàtukà musambu wa kumpala. Nwènù bakulumpe aba, pàvwà... Bavwa ne cilele cya kwanji kukenketa misambu kumpala kwa kuyilekelabo bayimba ku bisanji. Kadi musambu wa kumpala wàkapàtukà, ùvwa ngwa ne: “Bikònyaayi’s, nwènù tukajaana, bikònyaayi, nuleeje binù byenu bilenga abi,” ne byònsò mushindu awu. “Sekaayi tààwù ne mààwù, nubaseke bònsò lukenyi ne ‘ha-ha-ha!’” Ki wà kumpala ngwòwù awu wakapicishabo. Nudi nwela meeji ne mulumyana mwine wàkafùnda musambu awu awu udi usanganyiibwa mwaba kaayi diloolo edi? S’ukaadi mufwe.

²²³ Nudi nwela meeji bishi bwa Clara Bow, wàkapàtuka wa kumpala e kwakula pa, *Mbùngakeenu Yà Njìwù*, ne mujì wa maja wa uvuula ne bilàmbà wa bwena wàkatùma binunu ne binunu bya misuuka mu iferno awu? Nudi nwela meeji ne udi usanganyiibwa mwaba kaayi diloolo edi? S’ukaadi mufwe kukaadi ntanta mule. Ùdi penyi mwine awu, ne mubidi wende mwine awu? Mulaale muntu mwamwa, mutukunya mênù mu lupwishi amu, misanda ne bikusu’s biwùdye bibwelè bipàtùke. Ne musuuka wende’s ukaadi usanganyiibwa dyamwamwa kumpala kwa Nzambi mwakane.

²²⁴ Muntu mwine wàkangata mukaji awu e kwenzaye bilàmbà bibi kumona bidibo bavwala abi awu udi penyi, bwa kubatuntamija nseke yònsò, kabiyi bibàkùmbànne to? Bamba ne: “Cidibo bafwanyine kwenzela biine ebi ncinyi? Cinudi nuvwadila biine bintu bya mushindu awu abi ncinyi?” Cinudi nukeba’s mbwa balume biikàle banutangila, bwalu kakwena mùngà mushindu wa kujaadika aci to.

²²⁵ Kabidi udi mumanye ne paudi wenza ciine aci apu, ne kangènzàmpèkààtù kakwabo kaa kale kakutangila, udi mumanye cidi cyenzeke? Ku Cibasa cya Cilumbulwidi... Udi wamba wêwè ne: “Mwaneetu Branham, mémè ndi ne lulamatu kudi bayaanyi ne mwanyi mwònsò.” Neubadiibwe mupiile bu mwende masandi. Yesu wakamba ne: “Ewu yònsò watangila mukaji bwa kumwalakana wamanyi kwenda nende masandi mu mwoyi wende.” Piikalà mulume awu ne cya kulumbulula

bwa dyenda dya masandi, wíkala mumwendeshewu nganyi? Mushindu wúvwà wèwè muvwale ne wúvwà mudizanjike awu.

226 Mpindyewu, ncyèna njinga kwamba ne wikale uvwala bilàmbà mwenze bu cintu cikwabo cya mu bikondo bya kalekale to. Kadi, s’udi mwa kwikalaku anu ne mmwenekelu wa inàbànzà menemene.

227 Nenu upatuka apa uvuula bilàmbà, muvwale kaputulu keebe kakese kîpì aku, mudinyinge ne kakaba kaa cilàmbà mushindu ewu, ne kânà keebe kaa mu diboko ne twísù bu kakopo kaa kutuutwilamu butu bwa mfwanka, wèwè ne mucu wa mfwanka ku mishiku, wenda upweka ne mùsèsèsù. Kwèna wenza nanku mu kiipacila kîmpè to. Udi mufwanyine kwikala kuyi mupiile ku bwalu abu to, kadi dyabulu yèyè ngudi ukwata nee bu mudimu bu cyamu cyende cya mudimu anu mwakenzaye ne Eva amu.

228 Nditunga dya mwànà mukaji bwa cinyi? Bwalu diyaaya ditangile buludi ku dikookeshiibwa kudi bwena Katolike. Cidi cinyi leelu ewu? Kanwenaku nubumvwa bateela Yesu to. “Mwoyi Mariya! Mariya, maamù wa Mvidi Mukulu! Cecilia Munsantu!” Bansantu baa mishindu yònsò, bansantu bafwe. Kî nkwanji kwenza ntanta mule to, mwamwa mu . . .

229 Mvwa mwamwa mu Mexique, cidimu cishaale eci. Ki mukaji mukwabo mukwate ne bya luse ulwâlwa ewu, wenda ukalaba. Binù byende, bipuluke byònsò mushindu awu, ne dikoba; ùdila mwadi, muvunge byanza. Ne taatù wenda uya nende, mwambule twànà tukese tubidi, twikale tudila; mamwãbò ukenga bikole be; ciine aci bwalu mukaji kampanda, udibo babiikila ne mmunsantu, uvwa mufwe. Bavwa biimanyike lupingu lwende pa kakuna. Mulume kampanda uvwa munanga wende uvwa mumushebeye. Nenu padibì anu ne baamushebeyi mushindu awu, mu bushuwa bwa bwalu, yèyè umba ushaala munsantu; ùvwa mwena Katolike. Pa nanku ùvwa uya, bwa kuleeja didikengesha; nenu bivwa bikengela akalabe ntanta wa kilomeeta yisatu ne ndambu, ukalabila pa mabwe malamika panshi, bwa kuleeja didikengesha.

230 Mwaneetu, piikalaku ne kudiku cintu nansha cimwepele cidi cikengela mèmè kwenza, Yesu Kilisto wakafwa cyanaana. Ku ngàsà, ki kùndì musungidiibwe; kî mmu—mu mèmè mwine to, kadi ku diswa dya Nzambi, ne ku bwímpè bwa Nzambi.

231 Baakàmònakàmba abu kungeelabo lunkonko, ne: “Mukalenge Branham. . .” Mwànà mu—mukese wa mu diboko uvwa mufwe awu ukaavwa mubiishiibwe, ne ndambu wa bikwabo bintu bivwà byènzeka kwòkù aku. Beena Katolike binunu makumi asatu. . . To, numfwile luse. Bavwa binunu makumi abidi. Binunu makumi asatu bavwa mmu Afrike. Beena Katolike binunu makumi abidi kwakidilabo Kilisto bu Musungidi wabo sungasunga, musangu umwe,

pààkenzekà bwalu abu, mêmè mwimane mu Mexico City. Nenku bansaserdose abu, kabayiku mwa kupeta cya dyamba to; bavwa bapite bûngì, bivwa bifwanyine kujuula cimvundu. Bavwa bapite bûngì ku luseke lumwe. Ki yêyè awu kwamba ne: “Mukalenge Branham, udi wela meeji ne bansantu beetu twètù aba badiku mwa kwenza cintu cimwecimwe cyûdi wenza eci?”

²³² Bu mûmvwà mumanye dilongesha dyabo, mêmè kwamba ne: “Cya bushuwa’s, piikalabi ne badi ne mwoyi.” Nwamonu anyi? Pa nanku, kwêna mwa kwikala munsantu wa beena Katolike paudi kuyi mwanji kufwa to, munudi bamanye.

Ki yêyè ne: “Kaa, kadi kwêna mwa kwikala munsantu paudi kuyi mwanji kufwa to.”

²³³ Mêmè ne: “Mmwaba kaayi unudi nubala ciine aci? Pôlò mmwambe ne: ‘Kùdi bansantu bàdi mu Efeso,’ ne aba bàdi babiikidiibwe kudi Nzambi. ‘Kùdi bansantu bàdi mu Efeso,’ ùvwa ubala mukanda wende mubafundila; ne bansantu bàdi mu myaba mikwabo, mu Galatiya, ne—ne ‘bansantu bàdi mu Loomo,’ ne bakwabo. *Bansantu*, ‘bàdi bajidiibwe abu.’ Bwa aci nudi nwamba bishi?”

²³⁴ Yêyè ne: “Mu bushuwa bwa bwalu, bwa mpindyewu, katwena ne cya kukokangana pa Bible to. Bwalu, twètù tudi ekeleeziya, nenku anu cidi ekeleeziya wamba aci. Katwena bwalu ne cidi Bible wamba to. Anu cidi ekeleeziya mwambe.” Yêyè ne: “Kadi webe mmwenenu wêwè udi cinyi dîbà adi pa bidi bitangila ekeleeziya wa Katolike?”

²³⁵ Mêmè kwamba ne: “Mvwa mwa kujinga bwa kwikadiku mungeele alu lukonko to. Bu mûdi mulungeele, nanku nênkwambilè Bulelela.”

Yêyè ne: “Ee, ndi muswe ungambile Bulelela.”

Mêmè ne: “Ki mushindu mutumbuke wa ditendeleela dya bakishi dîndîku paanyi mumanye.”

Yêyè ne: “Mmunyi mûdi ukafika ku dyamba aci?”

²³⁶ Mêmè kwamba ne: “Cyônsò cidi cyakwilangana kudi bafwe mmutendeleedi wa bakishi.” Mêmè ne: “Munsantu awu yêyè wandamuna, mbwena kwamba ne ùdi ùsanganyiibwa mu iferno. Bwalu, aba bakaadi bamane kusambuka kajila aku, wanyi—wanyi Bible mmwambe ne kêna mwa kwalukilaku to.” Neya bushuwa. Ki mêmè ne: “Byôbì nanku, yêyè mwikàle munsantu, awu ndyabulu wakula byenze bu ne mmunsantu, kadi kayi munsantu awu to, twamb’eku twamb’eku.”

²³⁷ Ki yêyè ne: “Ee, mpindyewu, anji indila kakese.” Yêyè ne: “Wêwè peebe, s’utu wakwilangana kudi bafwe.”

Mêmè ne: “Penyi apu?”

Yêyè ne: “Yesu Kilisto’s wakafwa.”

238 Mêmè ne: “Kadi Yèyè’s wakabiika ku lufu. Yèyè kî mmufwe to. Kadi Ûdi ne mwoyi, bwa kwikala kwakwilangana, ki mene mutwangaji umwepele pankaci paa Nzambi ne bantu.”

239 “Ndi Ewu uvwa mufwe, kadi udi cyakabidi ne mwoyi, ne udi ne mwoyi bwa kashidi. Ndi ne nsapi ya lufu ne ya iferno.” “Ewu yônsò udi muswe, alwe kunwa cyanaana ku mâyi a Mwoyi.” Ekelekele! Ki wetu Nzambi nyawu. Ki wetu Nzambi nyawu.

240 Nenku dimiinu dya mwakane dikaadi disheepokete. Ambila bantu maalu aa. Ambila bantu bwa dyalukila dya ku njila wa Bible. Ambila bantu bwa bishima. Ambila bantu bwa cyôci aci. Wabo “ekeleeziya kèna witabuuja Cyôci aci to,” nanku mbânà baa panshi, bwa Nzambi. Bible mmwambe ne twètù katuyi mwa kutwala dikengesha, ne mateeta, ne tuseku, ne kubiikidiibwa bu “bansantu babunguluki baa mu malaba” ne bikwabo to, bya nanku awu, panwikala kanuyi mwa kubitwala to, nudi bânà baa panshi, kanuyi bânà baa Nzambi to. Bible ngudi mwambe nanku awu.

241 Umbiikile “munsantu mubunguluki wa mu malaba,” pawikala muswe. Umbiikile cyônsò cyûdi muswe kumbiikila aci. Padi anu mwoyi wanyi mwikàle mu bulongame ne Nzambi, ne dilabula dyanyi diikàle dikumbanangana ne Bible wa Nzambi, ndi ntungunuka anu ne kuya mutangile luseke lumwelumwe elu. Eyowa’s, mukalenge. Ki citudi twitabuuja ncyôci aci. Ki Ekeleeziya wa Nzambi udi ne mwoyi nyawu, udi kayi umufumina ku teoloji to. Kèna ufumina ku mmwenenu kampanda mukwatakaja kudi bantu, wa mamanya a mu mutu to. Kakuyi mpatà to udi ufumina ku Bulelela bubuulula bwa ne Yesu Kilisto udi Mwânà wa Nzambi.

242 Bu ne mvwa anu ne mmwenenu wa mamanya a mu mutu, bwalu ekeleeziya wa ba-Baptistes anyi ekeleeziya wa ba-Méthodistes mmundongeshe ne mbintu *kampanda*, pândi nteeleja Bible ewu, pìikalà Bible. . . Bu ne mvwa mubatiijiibwe mu dînà dya “Taatù, Mwânà, ne Nyuma Mwimpè,” kadi mêmè kubala Bible ewu, ne muyiishi kampanda kungambilaye ne kakwena mwaba nansha umwe ukaadibo babatiizangane mu mushindu mukwabo pa kuumusha mu Dînà dya Yesu Kilisto, ne mêmè kucibala ne kumona ne m’Bulelelela, mêmè’s mvwa mwa kudyèla mu mâyi ne lukasa lwônsò. Eyowa’s, mukalenge.

243 Bu ne muntu mmungambileku ne—ne Yesu Kilisto ki mwondopi munene, kadi ekeleeziya wanyi mungambile yèyè ne: “Matuku a bishima akaadi mamane kupita,” kadi paanyi mwikàle ne dijinga dya kwondopiibwa, ndi mufwanyine kunyeema lubilu ne mwanyi mwônsò, nya ku cyoshelu, bwa mêmè kwondopiibwa. S’nényekù cya bushuwa.

244 Bu ne mvwa muyiishi, ne mwikàle ne mu—muyiishi mukaji mu cyambilu cyanyi, kadi mubaleku mu Bible mmona ne mukaji

kêna ne cya kuyiisha to, s'ndi mufwanyine kuumushamu, nansha bya kumona lufu.

²⁴⁵ Vulukaayi ne, musòmbè anu paanyima mwaba udi Mwaneetu wa bakaji Wright wawa, diloolo kampanda, mukaji awu uvwa pabwipi ne kungeela pambelu paa ciibi pàapa bwalu mvwa mwenze cintu cya mushindu awu. Eyowa's, mukalenge. Mvwa mwambe ne: "Kwêna ulwa mu ekeleeziya wanyi mêmè ewu ne ntanyi yebe ayi. . ." Cikondo civwabo ne ciibidilu cya kuvwala, anyi kukosa nkanzu yabo lwa kwinshi eku nunku ewu, ne cintakanyi civwa ne mmwenekelu wa lukutukutu aci, ne citupa cya mibidi yabo ciikàle bwashi. Mêmè ne: "Bòbò badidinge anu bafike mu wanyi ekeleeziya, ncyà bushuwa ne nembèlè pambelu." Ki kakaji kakwabo kaa kakenyakenya ku mênù lwà kwinshi eku, mmufwe kakuyi kupite matuku to paanyima paa ciine aci; kadi pa dibà adi kumbiikidishaye, mwikàle ùkaadi ùpunga ne lufu. Úvwa nsongaakaji wa cyena Katolike, kubàndayè mwaba awu e kusòmba mwikàle muvwale cyòcì aci mushindu awu. Mêmè kutangila paanyima mmupongwela, musòmbè lwà apa, nenku bacivwa bimba misambu. Mêmè kukopola nkoozi wanyi, kuya piine paanyima apu, kumubwikilaye pa makaaya. Mêmè ne: "Mandamu, pawikala ujinga kunteeleja nyiisha, swaku uvwale nkoozi ewu paucidi mu ekeleeziya wa Nzambi apa." Nwamonu anyi? Ncyà bushuwa.

²⁴⁶ Yèyè kupatuka mwaba awu wenda utwa mikuma, mwalabaje tushiku atu. Kupatukaye mu citanda. Kwambaye ne: "Yèyè ne ntendeleelu, ncyênàku mufwanyine kwitabila wanyi ngombe bwa kwikalaye mu ntendeleelu wa mushindu awu to."

Mêmè ne: "Kabikutacishi to, kaakwikalaku nende to."

²⁴⁷ Pashiishe tuvwa benze ntenta, ki kumbiikidishabo pakaavwaye ùpunga ne lufu. Úvwa mupete disaamà dya mwoyi mwimane, nenku ùkaavwa ùpunga ne lufu. Bayende kulwaye. Ki yèyè awu: "Udi mwa, lwàku lukasa!" Mêmè paanyi munkaci mwa disangisha. Nsongaalume munene, mule, mwimane ku ciibi aku, mungindile. Ki mêmè kunyeema anu bu. . .

²⁴⁸ Mêmè kubwela mu kashinyi kaanyi kadi kupatuka e kukùya lubilu. Pàncìvwà ngenda mbànda apu, mêmè kutuutakeena ne munganga mukaji mukulumpe awu pambelu apu, wa bwena ucitu musòmbèle mu Howard Park awu, ucìdipù, ù too ne leelu ewu. Yèyè ne: "Révérend, kabyena ne dikwacisha bwa wèwè kulwa to." Kukaadi bidimu bitwe ku makumi abidi, pàmwàpa bipite apu ndambu. Yèyè ne: "Mmumane kufwa." Yèyè ne: "Wàfù kwènjà tusansa bu tusatu nanku awu." Yèyè ne: "Mmwele mbila mikole ya dikema, ukukeba wèwè." Yèyè ne: "Mêmè ngudi ne mukenji webe."

Mêmè ne: "Ncinyi nanku awu?"

249 Yèyè ne: “Ambilaayi muyiishi awu, ùmwà mwambe cyôci aci awu ne: ‘Swaku umfwile luse.’”

250 Mémè kupwekaku bwa mmumone. Mukaji mulenga kwisù; kadi ùkaavwa musaame bikole. Ùvwa ne tuntobengela tukese tukese ku dyùlù kwônsò eku; mukaji mulenga kwisù. Ne tuntobengela atu, bwa pa kumona, tùvwa twenze anu bu tujuukùlùka’s. Ne mèsù ende akaavwa mapatuke ônsò mu bimpòkòmpòkò emu, miikàle makudimuke maye mwamwa ndambu. Mu bushuwa bwa bwalu, byamunda byende ne twonyi bivwa binyungakane ne bipatule bunyawu, ne mupuuya mubànde too ne pa bulaalu pônsò apu, mushindu awu.

251 Ki bayende kuntangilaye, kwambaye ne: “Mwaneetu Branham, enzaku disambila’s, bwalu yèyè uvwa anu ukeba kukumona wèwè.”

Mémè kwamba ne: “Disambila bwende yèyè mpindyewu kî ndifwanyineku kwikala ne dikwacisha nansha dikese to.”

252 “Kùdì mucu mwinamine aku, ki kwadishindilawu.” Nwamonu anyi? “Kanudingiibu nansha; kabatu baseka Nzambi to. Cyônsò cidi muntu ukuna aci, ki cyapoolaye.”

253 Nudi numona mwaba ukaadici anyi? Mpindyewu cidi cyenzeke ncinyi? Tangilaayi numone mukaji udi mufwanyine kwenza nanku awu. Tangilaayi bakaji bavwa ne mwoyi kale wawa, nsongaakaji muji wa maja awu, mwanende wa bakaji wakalwa nganyi apa? Mukaji wa mvwadilu mubi. Mwànà wa bakaji wa mukaji wa mvwadilu mubi awu nganyi? Nsongaakaji muji wa bidùndadùnda. Wende pende mwànà wa bakaji neikale cinyi? Hum! Ncinyi aci?

Nudi numona dimiinu dya mwakane anyi?

254 Tangilaayi nwênù ba-Baptistes aba. Anjaayi kwalukila paanyima ndambu. Alukilaayi ku John Smith, mujuudi wa cisumbu cyenu, nwênù ba-Baptistes aba. Cikondo aci, ùvwa usambila bwa bubi bwa bantu, too, wèla mbila ne ùsambila bwa bantu too ne pavwa mèsù amuula abwita ne kubwita, ne bikengela bwa mukajende abange kumudiisha byakudya ku meesa, didya dyende dya mu dinda.

255 Ne nwênù ba-Méthodistes, mu nyungulukilu emu, ne tukanu tupayika ku dyùlu ne ku maci, numweka bu bisòmbedi bya pa tubalu bya dyabulu; kabidi nupatuka, bavwale tuputulu, ne bintu bya mushindu awu! Pavwa, mukulumpe John Smith, umwe wa ku bakulu baa ekeleeziya wa ba-Méthodistes, kumpala kwa kufwaye pakaavwaye ne bidimu makumi mwandamukulu ne bitaanu, wakayiisha kaadiyiisha kípì kaa bidimu binaayi, anyi, mèbà anaayi. Bivwa bikengela bamwambula bamuteeka mu cyambilu. Kadi mèyì ende a ndekeelu ngôwò aa. Wakamba ne: “Ndi mulendwishiibwe bikole be ku cyenedi cya ekeleeziya wa ba-Méthodistes.” Yèyè ne: “Ne bânà baa bakaji biine baa ekeleeziya wa ba-Méthodistes bakaadi bavwala tukanu twa

ngòlò ku minu.” Ûvwa mufwanyine kwamba cinyi mpindyewu ewu, pakaadibo bavwala tuputulu apa, biikàle bimba mu korale?

²⁵⁶ Nuvwa nunyeema bilenga. Cyènzèkì ncingayi? Nukaadi nwenza maalu bu mamwènù. S’ki cyòci aci menemene.

²⁵⁷ Ki bwa cinyi twètù katwena twitabila nansha dimwe dya ku mangumba aa bwa kushaalawu makulame mu nyungulukilu wa eci, pa, ne dîna dilamika apa ne: “Tudi ba-Méthodistes. Tudi ba-Baptistes” to. Twètù tudi anu baa Kilisto cyanaana. Cilekèlaayi mushindu awu, ikalaayi badishikamine.

²⁵⁸ Mpindyewu, nudi numona dimiinu dya nyoka anyi? Ncifwanyine kuyiila mushinga kaayi kudi mukaji wa mushindu awu? Ciine aci ncifwanyine kwenza cinyi? Cinyi? Bòbò mbatungunuke, benda balwa anu kulwa. Mbasake ba-Baptistes paanyima, basake ba-Méthodistes paanyima, basake ba-Prasbytériens paanyima. Cidibo benze ncinyi? Mbaalukile bònsò paanyima, bu mamwábò, ndumba wa kale awu. S’ki bòbò bònsò abu, benda bundumba bumwebumwe abu. “Ee, aci kaciyena ne cidici cishintulula to. Batu biinyijiibwe mu mâyi. Batu bamyaminyiibwe mâyi pa mutu. Bòbò, mbalwe, benze ditonda dyabo. Mbalame cijila cya bivwabo babakandike abi munda mwa ngondo yisambombo; kî mbanwe maala mapitepite bûngì mu ntanta mwine awu to, ne bikwabo. Mbashaale bidimba bîmpè. Batu bafuta bîmpè pa . . .” Kaa, ekelekele! Aci kaciyenaku ne dipetangana ne mamuma a Nyuma to.

²⁵⁹ Mamuma a Nyuma adi “diitabuuja,” kwitabuuja Yesu Kilisto umwèumwè awu makeelela, leelu, too ne kashidi; “dinanga” bwa bânà beetu; “disanka, ditalala, mwoyi mule, bwîmpè, kalolo, lutuulu, bupole, didikanda.” Ki bintu mbyòbi abi, mamuma a Nyuma.

²⁶⁰ Kadi twètù tudi twangata muntu ne: “Ee, udi—udi ne nsòmbelu mwîmpè ne beena mutumba.” S’ki muvwa pende Esawu.

²⁶¹ Esawu kavwa wenzelaku muntu nansha umwepele bibi to, kadi’s Esawu awu uvwa wa dyabulu; kadi Yakobo, mupatuke munda anu mumwemumwe amu, uvwa wa Nzambi. Dimiinu dya dyabulu; Dimiinu dya mukaji, Dimiini dya Nzambi ndipicilemu.

²⁶² Mpindyewu, nudi numona’s, byònsò mbipweke too ne ku cyòci eci, ne mbikashaadile ku cinyi pa buloba leelu ewu? Eci nèncyàmbè ne mèyi mashile ncyoncyoncyo, bwa kupoopelapu musonso, pashiishe netubange ditabuluja paanyima paa cyòci eci, mu disangisha dyàlondà. Mbikafike too ne ku mmwenekelu kampana. Nèku, bu nwènù mwa kuswa, ncyèna ngamba bwalu ebu bu dinyangakaja dya cijila to. Ncyèna ncyamba bwa kwikala ne lwonji to. Ncikafike pa mwaba wa ne, cikaadi musùmbà munene, wa batendeleedi balela mu masandi, bânà baa panshi. Ki aanyi mèyi a ndekeelu ngòwò awu. Nku cyòci aci

menemene kukaadici cikafike. Nudi bamanye aci ne mbulelela. Mbikafike mu mwaba wa ne bikaadi bya didivwija beena ekeleeziya ne bidimba bya ekeleeziya: “Biikàle ne cimwenekelu cya difwana dya Nzambi, bavila Bukole bwadi,” too ne mwalubi kufika ku musumbà wa batendeleedi, bânà baa panshi. Ki cyôci aci menemene.

²⁶³ Cidi cishaale cidi cilondà ncinganyi? Kudi ciidizaji cya bombe cilembeje muulu mwamwa, byàbûngi, bombes ya cobalt ne bikwabo byônsò. Mbindile anu bwa dîbà adi difikè. Nenu nekwikale kabutu kaa ku kapyà, bu mwakenzekaku ku mâyi amu.

²⁶⁴ Nenu, balunda baanyi, cyônsò cyûdi wenza, pawikala mwena Kilisto ne mwikàle ne Nzambi munda mwa mwoyi webe, ne mumanye ne ukàadi muumuke ku lufu muye ku Mwoyi, s’bivwa bikengela wêwè kwikala muntu wa mutambe kwikala wa disanka pa buloba bujima.

²⁶⁵ Padi Nyuma Mwîmpè munda mwebe. . . Padi Bible wamba ne: “Yesu Kilisto umwèumwè awu makeelela, leelu, too ne kashidi” apu: mangumba adi amba ne: “Kadi twètù tudi twitabuuja ne bishima bikaadi bimane kupita”; Nyuma Mwîmpè udi wamba ne: “Amen, Yesu Kilisto udi umwèumwè awu makeelela, leelu, too ne kashidi. Biikalè nanku.”

²⁶⁶ Piikalà Bible mwambe ne: “Nyingalalaayi, nubatiijiibwe muntu ne muntu wa kunudi mu Dînà dya Yesu Kilisto bwa dilekelediibwa dya mpekaatu, nenupete kupà kwa Nyuma Mwîmpè. Bwalu mûlayi udi kunudi nwênù, ne bânà beenu balela, kudi baa Bisamba bya bende, bônsò badi kule, bûngi bwônsò bwabiikila Mukalenge Nzambi wetu. . .” (Bûngi bwônsò bwabiikila Mukalenge Nzambi wetu abu, nwamonu’s, kî mbûngi bwônsò bwabiikila ba-Méthodistes, bwabiikila ba-Baptistes abu to, kadi bûngi bwônsò bwabiikila Mukalenge Nzambi wetu abu, nebapete Nyuma Mwîmpè ewu, ne nebabatiijiibwe mu Dînà dya Yesu Kilisto, cidi Bible mwambe): padi anu aci cikulenga, udi wêwè wamba ne: “Amen!”

²⁶⁷ Ekeleeziya yêyè mmwambe ne: “Kaa, kabyena ne cidibi bishintulula to.”

²⁶⁸ Kadi Nyuma Mwîmpè ewu munda mwebe neatwe “amen” ku Dîyi Dyende.

²⁶⁹ “Muntu kaakwikala ne mwoyi ku dyâmpà nkaayaadi to, kadi ku Dîyi dîdi dipatukà mukana mwa Nzambi.” S’ki bwalu mbwôbù abu.

²⁷⁰ Ndi muswe bwa undeeje Mufundu umwe cyanaana udi wamba ne cimuma cya pomme ki cyàkabangà budi bwenda mpindyewu ebu. Ndi muswe bwa undeeje ne cyakadyabo civwa mbimuma bya pommès. Mêmè ngânùleeji mùwà Kaayina mwele meeji ne civwa ncintu cimwecimwe aci, ne mùdi dimiinu dyende dicikàle dyela meeji anu amweamwe awu.

271 Kadi dibuulula dya mu nyuma dya Nzambi didi dijaadika, ku Bible ne, civwa ndisangila dya mulume ne mukaji, mu mushindu uvwa kawuyi mwanyishiibwe to. Ki kwòkù aku kwàkafuminà bantu beenu baa mpolondo abu. Ki kwòkù aku kwàkafuminà mpekaatu wenu awu. Ki kwòkù aku kwàkafuminà dinyanguka dyenu adi. Ki kwòkù aku kwàkafuminàbi byenda bipweka.

272 Mpindyewu monaayi mu byònsò ebi—ebi, tangilaayi, nyo—nyoka uvwa ne meeji matwe misangu yibidi. Dimiinu dyende ditu anu ne meeji matwe misangu yibidi. Nenku ndi muswe kubànda mu cyambilu emu kukwata cikolokolo eci mu cyanza cyanyi, ne ngiimane mushimike makàsà aanyi pa cyambilu, bwa ngàmbe nunku. Nenku, leelu ewu, bantu beenu banene beena mamanya a mu mitu abu badi penyi? Mpaasata wenu udi mupweke muye kapeta dimanya dya mu mutu búngì cyanaana awu, mwikàle ujuuka wimana; yèyè's ki mpaasata wa ekeleeziya yidi mitambe bunene yidi mu ditunga edi, ne bikwabo bya mushindu awu. Mmwaba kaayi udi dimiinu dya nyoka adi disanganyibwa? S'mmu myaba ya meeji matwe ne lumvu bya mushindu awu's; bamanyi baa mabàla baa meeji matwe, baa budimu. Kwòkù aku's nkudiye usanganyibwa. Kwòkù aku's nkudiye mwadije nkwasu musòmbe.

273 “Kí nku bukole, kí nku dikanda to, kadi nku Nyuma Wanyi, mudi Mukalenge wamba.” Nwamonu anyi? Kwòkù aku's nkunudi nwènù aba . . .

274 Pashiishe nwangata mwaneetu wa balume mutekete udi mwimane kwinshi eku mu disangu, wela mbila mèsù amba kujoomoka, pàmwàpa mwimane mwaba awu wimba cindaala cya kale, wamba ne: “Mwaneetu, lwàku, upete Mukalenge!”

275 Mpaasata upicilapu, wamba ne: “Huh! Ncyênaku mêmè mufwanyine kwitabila dyanyi disangisha. . . Mona's, ncyênàku mêmè mufwanyine kwitaba bwa kuswikakana nende, ncyênàku mêmè mufwanyine kwitabila wanyi. . . ncyênàku mufwanyine kwanyisha bwa Liddy ne Johnny ne bakwabo bwa kummonabo mu mwaba bu wawa to.” Tungunuka nda kúyaayà, dimiimu dya dyabulu naanyi we, wèwè's udi uya mutangile ku mwaba webe wa ndekeelu wa Cyendeleele, twamb'eku twamb'eku. S'ncyà bushuwa. Nunku ndi mwambe mwaku mukwabo mwaba awu, kwamba ne “bànà baa panshi,” bidi anu bu ne mwaba awu ki ukaadibi menemene's. Bwalu, nudi numona's, nwènù . . .

276 “Muntu nansha umwe kèna mwa kulwa Kùndi padi Taatù Wanyi kayi mumukoke to. Ne ewu yònsò udi ulwa Kùndi, Nèmmubiishè ku lufu mu dituku dya ndekeelu. Kakwena cintu nansha cimwe cyàjiminà to. Mêmè ndi naaci. Nèncilamè. Muntu nansha umwe kèna mwa kucyenzaku to, pa kuumusha Eci.”

277 Byònsò mbilaale kudiYe. Kwèna mwa kwamba ne: “Mêmè ndi mwenze cintu kampanda” to. Ngàsà wa Nzambi ngudi mwenze byònsò abi. Pa nanku, kakwena cindikù mêmè mwenze

to. Ncivwaku mêmè ne cintu cya dyenza to; nansha wêwè, kuvwa naaci to. Kùtu mukumbanyineku cintu nansha cimwe to. Nzambi ngudi mwenze kantu ne kantu kaa byôbì abi. Kùtukù mujuule munu webe awu nansha bwa kandambu kaa cyôci aci to. Kwakamba ne: “Ee, ndi mupatukile mu famiye mwîmpè. Mêmè ngudi mwenze *cikampanda*” to. Aci kaciyena ne dipetangana nansha dikese ne cyôci aci to. Nzambi n’Yêyè Udi mucyenzè; nduse lwa Nzambi.

²⁷⁸ Numfwileku luse mpindyewu, katwena banji kufika pa dîbà dikumi ne dimwe jaajaaja to, kadi nkaadi pa kujikija, nansha nanku. Nwamonu anyi?

²⁷⁹ Mbanganyi badi bumvwa ne Bible udi wamba ne bintu ebi m’Bulelela? Nwênù beena Branham Tabernacle, nangananga. Mpindyewu, aci cidi anu bu cya pa dikumi ne bisambombo cimwe cya bitudi twètù tulongesha ne twitabuujja. Kadi, vulukaayi, bwenu nwênù babandidi, ndi mufwanyine kwamba nenku, nwênù badi balwa mwaba ewu kadi kanuyi bidimba to. Mushindu utudi twitabuujja cyôci eci, ne *Eci* m’Bible, ne Bible ki Bulelela bwa Nzambi.

²⁸⁰ Ne tudi twitabuujja, ne, mu Dipungila Dikulukulu, mpindyewu, bavwa ne mushindu wa kumanya civwa bulelela ne civwa kaciyi bulelela.

²⁸¹ Mpindyewu, tudi bamanye twètù bônso ne bavwa ne mikenji mifunda. Mbanganyi badi bamanye nanku? Mikenji, mê—mêyî matuma awu avwa asanganyiibwa mu musheete wa cipungidi, ne bikwabo; eyo, ne mikenji pa mêyî matuma. Yivwa yamba ne: “Kwendi masandi. Ewu yônso wênda masandi awu nebamwase mabwe.” Nwamonu anyi? Adi divwa ndî—ndîyî dituma, ne mukenji pa dîyî dituma. Mpindyewu, musheete wa cipungidi uvwa musombe mushindu *ewu*; mêyî matuma avwa munda amu, ne mikenji ya mêyî matuma yivwa mu bibombi ku luseke lwa musheete wa cipungidi. Bu muntu mwa kulwa mwaba ewu, mwende masandi; bavwa boolola anu cyaanza muntwamu bangata civwa mukenji mwambe ne, “bamwase mabwe.” Bavwa baya nende pambelu bakamwasa mabwe. Ki civwa mukenji wamba pa dîyî dituma adi.

²⁸² Mpindyewu bavwa kabidi ne mishindu mikwabo yibidi ya kumanya. Kùtu anu isatu misangu yônso, bu cijaadiki. Bavwa ne mushindu mukwabo wa kumanya, civwa anyi ku muprofeta anyi ku mwena ndoota. Mbanganyi badi bamanye aci? “Kwôkù muntu munkaci mwenu mwikàle wa nyuma, anyi muprofeta, Mêmè Mukalenge nêndîmanyîshè Mêmè mwine kudiye mu biloota, ne nêngâakulè nende mu bikeena-kumona.” Ncya bushuwa. Mpindyewu, uvwa mmwambi wa biprofeta.

²⁸³ Mpindyewu, bu muntu mwa kulwa, wamba ne: “Kaa, Aleluuyah, ndi mupete bwalu abu! Ndi ngamba ciprofeta mpindyewu mu Dinà dya Mukalenge. Ndi mupete dibuulula.”

Kabavwa balekela aci ciya nanku to, munutu nwênù aba nwenza amu. Bavwa banji kukenketa bwalu abu ne Nzambi, dyambedi.

²⁸⁴ Mpindyewu, pa cibwikilu cya pa cyâdi cya Aalona pavwa civwabo babiikila ne Ulimà Tuumimà. Mbanganyi bakaadiku bumvwe awu mwaku? Civwa ncinyi? Civwa mmabwe dikumi ne abidi, asambombo elu luseke ne makwabo elu luseke, a bankambwa dikumi ne babidi; jasje, Yuda, ne bikwabo, too anu nanku, mabwe dikumi ne abidi awu. Nenku bavwa bangata muprofeta ewu, anyi mwena ndoota ewu, ne bavwa bakudika cibwikilu cya pa cyâdi aci kuulu, bamwimanyika mwaba awu. Nenku bavwa bamba ne: “Mpindyewu ambaaku ciprofeta ne utulondele ciprofeta cyebe aci.”

“Mukalenge mmwakule naanyi mungambile bintu kampanda ne—ne bintu kansanga.”

²⁸⁵ Nansha cimweka cilelela bishi, civwa cifwanyine kumweka bu bulelela anu bwa menemene ebu; kadi pavwa mabwe awu kâyi adisanga enza diikala dya mwanzankongolo dicyamakane mwaba awu to, mu Ulimà Tuumimà amu, meekala awu adisanga cintu cimwe, citambe-mfùkulu ckwata mudimu, cishindika. Nwamonu’s, Nzambi utu misangu yònsò anu ushindika Dîyi Dyende. Nwamonu anyi? Nenku makênkè matambe mfùkulu awu ôwò kâyi mateeme mwaba awu to, dîbà adi nansha cyôci ciikàle cimweka cya bushuwa mushindu kaayi, civwa cya mafi.

²⁸⁶ Mwena ndoota yêyè mwambe ne: “Ndi muloote ciloota, ne ciloota aci ncyambe, ne: ‘Bidi bikengela Izaleela umuke aye mu mwaba kampanda, bwalu beena Suuliyà nebabwelele elu luseke bamucincimike.’” Bavwa baya ne mwena ndoota awu kuntwaku; ùvwa wawula ciloota cyende aci. Pavwa makênkè awu kâyi ateema macyamakane muntwamu to, ùvwa mwambe mafi, nansha mùvwà. . . Nansha byôbì ne beena Suuliyà bakaavwa bamane kwimana mu mushindu wa mvita kwabo aku, yêyè uvwa anu mwambe mafi. To, mukalenge. Bôbò, kakuyi mpatà to, bivwa bikengela cijaadikiibwe kudi Ulimà Tuumimà.

²⁸⁷ Mpindyewu bantu bônsò mbamanye ne bwakwidi bwa kale bwakamana kuya, babushipe, ne Ulimà Tuumimà wakaya naabu. Tudi bamanye nanku, kî mmwômò anyi?

²⁸⁸ Nenku bwakwidi bupyabupya bwakawela. Cinyi? Tudi leelu ewu ne Ulimà Tuumimà anyi? Eyowa’s, mukalenge. Dîyi dya Nzambi! Eyowa’s, mukalenge. Ki yêyè *Ewu*. Muntu nansha yêyè nganyi mwikàle ne dibuulula nansha dya mushindu kaayi, anyi wamba cintu nansha cya bishi, anyi dilongesha kampanda kadiyi dikumbanangana ne dilond- . . . ne kadiyi dilonda Bible ewu to, mu Mifundu yònsò nkòdng, awu mmwambe cya cyanaana. Nansha yêyè mwikàle wa mu dingumba kaayi, nansha yêyè mwîmpè wa bishi, nansha yêyè wa meeji matwe a bishi, nansha mulonge tulaasa twa bishi; mmwambe cya cyanaana.

289 Nenku padi muntu nansha yêyè nganyi ukwambila bintu ebi, bitudi balongeshe apa mpindyewu mu ekeleeziya emu ebi, ukwambila, ne: “Bôbò bakumyamine mâyi pa mutu, bidi anu bîmpè,” awu mmukwambile dishima. Aci kacyakuteemaku pa Ulimà Tuumimà nansha. Yêyè mukwambile, wamba ne: “Dipongolwelangana dya mâyi pa mutu ndya cya bushuwa,” mmukwambile dishima. Yêyè mukwambile ne: “Kubatiijibwa mu dîna dya ‘Taatu, Mwâna, Nyuma Mwîmpè,’ nkwîmpè,” mmukwambile dishima. Yêyè mukwambile ne: “Cikondo cya bishima cikaadi cimane kupita,” mmukwambile dishima. Yêyè mukwambile ne: “Bidi anu bîmpè bwa bakaji kuyiishabo,” mmukwambile dishima. Yêyè mukwambile ne: “Bidi anu bîmpè bwa wêwè kutungunuka ne kushaala mulamate ku dingumba dyebe,” mmukwambile dishima. Aci kacyakuteema pa Ulimà Tuumimà to. Ne makumi a bintu bidì bipatuke, mu “MAAMU NDUMBA” wa kale awu abi, biikàle bisambuluja muntwamu, nenku mwaba awu ki bwa cinyi twètù tudi baditole bashiyangane ne dingumba.

290 Tudi banange bànà beetu baa balume ne baa bakaji badi mu miine mangumba awu abu. Kadi kî nkuya, wenda wamba ne: “Mêmè ndi Méthodiste,” nenku udivwija mwena Kilisto to, bwanyi mêmè. Udi mwena Kilisto bwalu udi mulediibwe ku Nyuma wa Nzambi. Kabyena ne mushinga bwa wêwè kwikala Méthodiste anyi Baptiste to. Kabyena bikengela bwa wêwè kwikala nî n’gewu nî ng’ewu to. Bidi bikengela anu bwa wêwè kulediibwa ku Nyuma wa Nzambi. Nudi nwitabuuja aci anyi?

291 Pa bishimikidi ebi, muntu yêyè mwaba ewu ujinga kutwela diboko ne kubwela mu bwobumwe bwa dikuukwila edi, ne muswe—muswe kwinyijibwa, kubatiijibwa mu Dîna dya Yesu Kilisto, ciinà cya mâyi ncyôci eci. Nebiikale mwa kubatiizangana, mu katanci kakese aka.

292 Kudiku muntu, bantu bàabûngî mwaba ewu, muntu kampanda muswe bwa kulwa, mu mushindu kaayi wônsò anyi? Nyewu tudi mwaba ewu. Ncya bushuwa.

293 Mpindyewu, twètù—twètù katwena ne bya kwikala cidimba abi to; wêwè udi ulwa anu apa cyanaana mu ekeleeziya ewu. Tudi twitabuuja ne Kilisto udi mu ekeleeziya wa ba-Méthodistes, mu ekeleeziya wa ba-Baptistes, mu ekeleeziya wa ba-Presbytériens. Yêyè udi ne bidimba mu yônsò wa ku yôyi ayi. Kadi cidì cipangike, leelu ewu; ciprofeta cya mashimi ncidì cipatula bintu abi, dilongesha dya ekeleeziya ayi, didi kakuyi mpatà to diikàle dibengangana ne Bible.

294 Mpindyewu, muntu yêyè mundeje Cyôci aci bitooke tòò mushindu awu, ncya bushuwa ne mêmè ndi mufwanyine kudyenzeja...ndi ngiitabuuja ne mudi Nyuma wa Nzambi bûngî bukumbane munda mwanyi, bwa kukenketa mu Bible awu ne kulwa kucilongolola. Bu mêmè mwa kujuuka anu kuulu

cyanaana kadi kulabula muyiishi ku cyanza, ne kufundisha dîna dyanyi mu mukanda, kadi mutungunuke anu ne kwikala ne lukinu ne budimu mu mwoyi wanyi, ne mutungunuke anu ne kwikala ne lukuka ne dikokangana, ne mutungunuke anu ne kubenga kwitabuuja ne Yesu Kilisto m'Mwondopi munene, ne bikwabo bya mushindu awu, ndi mufwanyine kuya kadilongolola kumpala kwa Nzambi, ne lukasa lwônsò. Ndi ngiitabuuja cya bushuwa ne ki cîndi mufwanyine kwenza. Ndi—ndi mufwanyine kwikala ne meeji matooke a mushindu awu pa bwalu abu. Ndi mufwanyine kuya kadilongolola kumpala kwa Nzambi. Mêmè mushaale anu kacya ngâlamatakù ne bwalu nyawu ndi Baptiste anyi Méthodiste, ndi mufwanyine kuya ku binù bwa kupeta bwena Kilisto mu mwoyi wanyi. Ki cîndi mufwanyine kwenza. Eyowa's, mukalenge.

²⁹⁵ Mpindyewu nwavulukaayi ditabuluja didi dilondà, diikalà mwa kubanga, bu Mukalenge mwa kwanyisha, mu diloolo dya diisâtù dilwalwà edi. Nediikale pa biine bishimikidi ebi.

²⁹⁶ Teelejaayi, balunda baanyi, kudi Nzambi mulelela ne udi ne mwoyi. Ncya bushuwa. Yesu Kilisto m'Mwânà wa Nzambi. Nyuma Mwîmpè udi mu Ekeleeziya leelu ewu.

²⁹⁷ Mpindyewu, bu byôbì anu ne muntu kampanda ngudi mungambile ciine aci, ndi mufwanyine kwikala ne bukenji bwa kucyela mpatà. Kadi, teelejaayi. Dîngà dituku kuntu kwaka, pâncivwà mwânà mutekete, mwva mwimane mwînshi mwa mucu kampanda; mêmè kuMumona. Mêmè kuMuumvwa. KungambilaYe, ne: “Wikale kule ne bakaji baa nsòmbelu mukooyike abu. Wikale kule ne mfwanka. Wikale kule ne dyela dya milawu, dinwa dya maala, ne bintu byônsò ebi. Ndi ne mudimu wa wêwè kwenza pawakola.” Ndi mumanye ne Yêyè n'Nzambi wa cya bushuwa, udi ne mwoyi ne mwikâlè ûshâàla ne Dîyî Dyende.

²⁹⁸ Pângààkakolà ndambu, mushindu mwine uvwaYe utwilangana naanyi, mushindu mwine uvwaYe wakula naanyi! Mushindu mwine wûngààkaMumônà kuntu kwaka, bu cipuka cilakuka kapyà, ne Kapyà aku kiikâlè kanyunguluka kwine aku! Mushindu mwine wûnkaadîku muMumone wakula ne wamba anu menemene maalu avwa mwa kwenzeka; kabidi, misangu yônsò, byenzeka anu mu byôbì menemene, anu menemene mushindu awu.

²⁹⁹ Yêyè umwèumwè Awu utu wamba maalu anu mu ôwò mushindu awu awu, n'Yêyè umwèumwè Awu udi unsonsola bwa kulongesha Bible ewu menemene anu mushindu wûndi mMulongesha ewu. Ncya bushuwa. Pa nanku, Cidi cifumina kudi Nzambi. Bwanyi mêmè, n'Nzambi wa Bukole bwônsò, ne Yêyè udi umwèumwè awu makeelela, leelu, too ne kashidi.

³⁰⁰ Yesu wakamba ne: “Ndi mufume ku Taatù, ne Ndi nya ku Taatù.” PaakalwaYe. . .

301 PavwaYe Nzambi mu cipeela, Ûvwa Bukênkè buvwa buteema kapyá. Nenku mbanganyi badi bamanye nanku? Ûvwa Bukênkè buvwa buteema kapyá, Dikunji dya Kapyá.

302 Nenku kulwaYe pa buloba apa, kwambaYe ne: “Ndi mufume ku Taatù, ne ndi nya...Ndi mufume ku Nzambi, ne ndi mpingana ku Nzambi.”

303 PaakafwaYe, kujiikiibwa, kubiika ku lufu, ne Pòlò mu njila wa ku Damaseke kutuutakeenaye Nende cyakabidi, Yèyè uvwa cinyi? Ûcidi anu Dikunji dya Kapyá. Eyowa’s, mukalenge.

304 CyakenzaYe ncinyi pavwaYe pa buloba apa? CyakenzaYe ncinyi paakatuutakeenaYe ne Pòlò? Wàkamutùma bishi? Yèyè wakamutuma kudi muprofa wàkamwambila mushindu wa kubatijiibwaye, wàkamwambila cya dyenza; kumutentekelaye byanza ne kumwondopaye, kumwambilaye muvwaye mumone cikeena-kumona.

305 Yesu umwèumwè awu udi mwaba ewu leelu ewu, wenza bintu bimwebimwe abi, mucikàle anu Dikunji dya Kapyá dimwedimwe adi, ulongesha cintu cimwecimwe aci, mwikàle ucishindika ku Dìyì Dyende, ne ku bimanyinu ne maalu a kukema. Mémè ndi ne disanka dinene dya kwikala mwena Kilisto, mu mushindu wa ne ndi mupange ne cya dyenza’s. Ndi ne disanka dya bu mùdì wèwè mwena Kilisto.

306 Nenku nwènù, tabernacle ewu, nkaavwa munwãmbile ne netushintulule dìnà dya cyòci eci. Kì mbìmpè bwa kwikalaci Branham Tabernacle to. Awu’s udi anu muntu, nwamonu’s. Netushintulule dìnà dyende, bwa kumwinyika dìnà kampanda dya cyanaana. Netufike ku cyòci aci, paanyima paa cikondo. Mémè ndi muswe bwa cìikalè anu ekeleeziya wa—wa Nzambi udi ne mwoyi. Ncyèna muswe bwa kwikalaye Méthodiste, Baptiste, Presbytérien, wa Mpenta nansha. Ndi . . .

307 Bantu bônso abu, ndi mubanange ne mwoyi wanyi wônso. Ncyèna mumanye ne ng’ewu anyi ng’ewu to. Ncyèna mwa kunwambila to. Bikengela mémè nyiishe anu Dìyì. Ndi ngeela bukondo mbukoka ku mukuna. Mudi ndimba, mwikàle kabidi ntàndà ya mu màyì, mwikàle kabidi nyoka, kabidi, mwikàlekù mishipa. Nzambi ki wabisunguluja. Mémè cìndi mumanye nkukoka bukondo cyanaana, kuyiisha anu Dìyì cyanaana ne kubukoka ku mukuna, ngamba ne: “Kì bôbò aba, Mukalenge, banyungulukile cyoshelu. Wèwè ngudi mumanye badi Beebe Wèwè; Wèwè udi mubamanye kacya ku cifùkidi. Mémè ncyèna mumanye ne ng’ewu anyi ng’ewu to. Wèwè ngudi mumanye, nanku bwalu budi kùdì Wèwè, Mukalenge. Kì cidì citambe bwìmpè cìndi mémè mwa kwenza. Nènye kuntweku nkalobe ne bukondo bwa cyàtà mu mwaba wa cyanaana mpindyewu, bwa nkabweje musùmbà mukwabo. Kì cyònsò cìndiku mémè mwa kwenza.” Eyo.

Kaa, ndi ngumvwa anu bu ne ndi ntungunuka
ne lwendu,
Ndi ngumvwa anu bu ne ndi ntungunuka ne
lwendu;
Nzubu wanyi wa mu Dyulu udi ubalakana ne
mwîmpè,
Nenku ndi ngumvwa anu bu ne ndi
ntungunuka ne lwendu.

³⁰⁸ Mpindyewu vulukaayi ne, muntu yônsò udi ujinga bwa twêtù kwangata nende cipungidi, abikile anu Mukalenge Mercier mwaba ewu: BUTler 2-1519. [Nomba wa telefone ewu bakaadi bamushintulule.—Muf.] Netwikale ne disanka dya kukumona. Bananga beebe bu bôbò mwa kulwa, biikàle bikengela bwa kulwijakajabo mu cikondo cya ditabuluja aci. . . Mpindyewu ndi nya, kuumukila diloolo edi, bwa kwikala mwaba wa nkaayaanyi, ne kwikala nciyipu munda mwa matuku abidi mpindyewu, paa nkaayaanyi.

³⁰⁹ Ndi nkabwela anu muntwamu ndifila ku dilonga, nunku ewu ne: “Mukalenge, Wêwè udi pabwîpî naanyi. Ndi mumanye ne Wêwè udi mwaba ewu. Ne Dîyî Dyebe ndyambe ne Wêwè neusemene pabwîpî ne aba badi baseemena pabwîpî Neebe.” Ndi ntungunuka ne kusambila ne kutangila too ne pândî mmona Dikunji dya Kapya adi dibanga kutwa eku ne eku. Ndi mmanya pa dîbâ adi ne cintu cikaadi pabwîpî. Pashiishe ndi mbwela nya pa cibumba cya ku cyambilu bwa mudimu wa dyondopa, bwa kusambila, ne kwenza mwanyi mwônsò bwa kukwacisha babeedi ne badi mu ntatu.

³¹⁰ Tudi twanyisha musangeelu wenu wônsò awu mpindyewu. Nenku panwalwa, nulwayi biikàle nwitabuuja, bwalu tudi bindile bwa kupeta disangisha dinene. Ndi njinga kwamba ne. . .

³¹¹ Mwaneetu Jeffries, yêyè udi mwaba ewu diloolo edi anyi? Tudi baswe kwanyisha Mwaneetu Jeffries ne mudimu wende. Ngeela meeji ne yêyè ukaadi mumane kwalukila muye ku bisanga, ne bikwabo.

³¹² Ndi ne disanka dya kumona Mwaneetu wa balume ne Mwaneetu wa bakaji Wright, ne bàâbûngî beenu mwaba ewu.

³¹³ Kabidi ngămònu ndumbùlùlà Robertson mwaba ewu, katanci aka, mwikàle ubwela kukaadi katanci. Mvwa njinga kumwela kaalumbandi bwa—bwa mukenji wende uwayne mufile dituku adi. Muntu nansha umwe kavwà mwambe ne ùvwa nganyi to. Aci’s civwa ncintu cya bundu’s. Ùvwa mufile mukenji mwîmpè mutambe pa ciprofeta, cintu cyenze bu cîndi mfuma ku diyiisha diloolo edi eci.

³¹⁴ Ne, pa nanku, pashiishe kuvwa muyiishi mukwabo apa mu dinda emu, anyi makeelela diloolo, Mwaneetu Smith, wa mu ekeleeziya wa ba-Méthodistes. . . anyi wa mu Église de Dieu,

lwà mwaba ewu. Ncyèna mumanye ní udipu diloolo edi, anyi kénàpu. Bu wèwè mwa kwimanyinaku lwà mu cyambilu emu ne kutangila paanyima pààpa kunùdi aku, s'mbyenze bu bikole bwa kumona; mbyenze anu cyàtà kacya byaya, nudi numona's, nenku kamuyi mushindu wa kumona bîmpè to. Pawikala mwaba ewu, Mwaneetu Smith, tudi tukwanyisha.

³¹⁵ Ne ewu, udi musòmbe apa ewu, kî mmwaneetu wa balume mutekete wa ku Géorgie, lwà paanyima apa musòmbe ku luseke lwa Mwaneetu Collins anyi? [Mwaneetu Neville udi wamba ne: "Nyèyè."—Muf.] Ndi ne disanka dya kukumona cyakabidi diloolo edi, wèwè mwaneetu.

³¹⁶ Ne bakwabo baa kunudi, nwènù bônso, muntu yônso mmumanye ne nudi banganyi.

³¹⁷ Ngeela meeji ne aba mmwaneetu wa bakaji ne mwaneetu wa balume bavwa baye kasambidila mwànà wa bakaji awu abu musangu awu, lwà mwaba ewu mene, ngangabuka udi musòmbe apa ku luseke eku ewu. Mukalenge akubeneshe, ngangabuka.

³¹⁸ Mpindyewu, swayiku bwa kanwikadi nwyadyumvwa bu mèmè munutape ku mwoyi to, nwènù bambi ne bânà beetu, bwa mushindu wùndi ntuuta musonso pa bwalu ebu mbukolesha ne mwanyi mwônso. Ewu n'tabernacle wetu. Ki citudi tutwa nyama ku mikolo, ne tudi baswe kuCiteeka anu pa Dìyì adi, ne kubanyukulula naaDi. Nenku, byôbì mwa kwenzeka ne upatuke mu njila, netwalukile e kwamba ne: "Wèwè ewu's utu mumanye cidi cîmpè. S'nCyôci eci pa mukaba wa mèyì." Nwamonu anyi? Ki bwalu mbwôbù abu. "S'ki Cyôci eci pa mukaba wa mèyì apa."

³¹⁹ Tucidi ne bikwabo byàbûngì bivwa bikengela kusakidila mwaba awu, Leo. Kadi, kadi tudi. . . Wàmanyi kupeta bûngì abu. Shaala anu ne Cyôci aci, nenku netupete bidi bishaale bya ku Cyôci aci pashiishe. Byenze bu muntu awu, ùvwa udyā midyangu, wamba ne: "Yivwa milenga be, kadi kucidi mikwabo." Nanku tucidi kabidi ne byàbûngì bya ku Cyôci aci, kabidi, bicikàle bilwa.

³²⁰ Mukalenge anubeneshe, bya bîmpè menemene mpindyewu. Patucidi tu-. . . Netwènzè mudimu wa dibatiiza mpindyewu ewu. Mmwômò anyi, Mwaneetu Neville? [Mwaneetu Neville udi wamba ne: "Eyo, ki mûndi ngiitabuujā."—Muf.] Kudiku muntu mwaba ewu udi ukengela kubatiiza mpindyewu ewu anyi? Nansha wèwè mwikàle nganyi; tudi—tudi apa mbwa kubatiiza. Elaayi byanza muulu, aba bavwa bakengela kubatiiza. Muntu mukwabo, ngeela meeji uvwa. . . Inàbànzà ewu nyewu udi apa. Nenku kuvwaku muntu mukwabo anyi? Mpindyewu, tudi ne bilàmbà mwaba ewu ne bwa balume ne bwa bakaji.

³²¹ Mpindyewu, katwena twamba ne: "Umuka mu ekeleeziya wa ba-Baptistes. Umuka mu ekeleeziya wa ba-Méthodistes" to. Katwena twamba aci to. Alukila wèwè anu buludi ku ekeleeziya webe. Kadi pawikala kuyi mubatiijiibwe bilondeshile Mufundu

to, mu Dîna dya Mukalenge Yesu. . . Kadi, kî mmu Dîna dya “Yesu” nkaayadi. Mu Dîna dya “Mukalenge Yesu Kilisto,” ki Mufundu ngwawu. Mbakubatiize bibi.

³²² Ncyêna muswe lutatu nansha lukese to pângààfikà ku musulu. Ndi muswe maalu ônsò ikale matooke mu dyanyi dimanya dyônsò, pândi mukwate ticket awu ku byanza apa, nwamonu’s, bwalu ndi muswe mbwele mu mazuwa pa diine dîbà adi. Ndi muswe kukubela bwa kwenza bya mwomumwe.

³²³ Walukile ku ekeleeziya webe. Abu bwalu, mpankaci peebe wêwê ne Nzambi. Ki cyônsò cîndi mêmè mwa kukwambila ncyôci aci.

³²⁴ Kadi muntu nansha umwe mu Mifundu kâtukù mwanji kubatijiibwa mu mushindu mukwabo to pa kuumusha mu Dîna dya “Mukalenge Yesu Kilisto”. Ne aba bakaavwà babàtijiibwe, baakabatumina dîyi kudi Pôlò Munsantu, wâkamba ne: “Mwanjelo yêyè muyiishe cintu cikwabo, ediibwe mulawu.” Yêyè kubatumina dîyi bwa kulwabo kubatijiibwa, cyakabidi, mu Dîna dya “Mukalenge Yesu Kilisto.” Ncya bushuwa. Ne yêyè ki cyakenzaye. Ne cyakenzaye aci, yêyè wakatutumina dîyi bwa twêtù kucyenza; ki citwenzà, bu Nzambi mwa kwanyisha.

Tudi twitabuuja dyoweshangana dya mâyi ku makàsà. Tudi twitabuuja meesa a Mukalenge.

³²⁵ Tudi twitabuuja Dilwa dya cyakabidi dya Kilisto, dya dimweneke ne mèsù adi, mubidi wa musunya wa Mukalenge; kaciyi Nyuma to, kadi mubidi wa musunya wa Mukalenge Yesu mwikàle ulwa cyakabidi mu butumbi.

³²⁶ Tudi twitabuuja dibiika dya bafwe dya mubidi, bwa kupeta mubidi, kawuyi wa mukulakaji mwikàle ne minyengu bu mutudi tubwela mu lukita to; kadi mupyamupya, mu disanka dya menemene dya bunsonga, bwa kwikala ne mwoyi kashidi.

³²⁷ Tudi twitabuuja dibenga kufwa dya musuuka, kakuyi mpatà to. Tudi twitabuuja ne kudi mushindu anu umwepele wa Mwoyi wa Cyendeleele, ki Mwoyi wûdi upeta kudi Kilisto Yesu awu. Ncya bushuwa menemene.

³²⁸ Ki bwa cinyi, katwena twitabuuja bya dinyookiibwa dya Cyendeleele abi to. Tudi twitabuuja kadilu kaa iferno, kiikàle koosha ne soufre, kadi katwena twitabuuja ne kadi koosha kashidi to; kôkô koosha kashidi, udi ne Mwoyi wa Cyendeleele. Kudi Mwoyi wa Cyendeleele anu umwepele; ng’Ewu udi ufuma kudi Nzambi. Ne aci ki cya bushuwa. Newoshiibwe, pâmwâpa munda mwa mùliyô wa bidimu, miliyô dikumi ya bidimu, ncyêna mumanye to, kadi kwêna mwa kwikala ne Mwoyi wa Cyendeleele to. Kwêna mwa kwoshika kashidi. . . Udi mwa kwoshika kashidi, kadi kî n’Cyendeleele to. Nudi numona’s, kudi dishiilangana pankaci paa Cyendeleele ne kashidi. *Kashidi* mbwena kwamba ne kashidi ne kashidi, mutwangaji, biswa

kwamba ne “cipoolo cya dībà.” Kadi, Cyendeleele, kwèna ne dinyooka dya Cyendeleele to.

³²⁹ Udi ne Mwoyi wa Cyendeleele, bwalu kudi mushindu anu umwepele wa Mwoyi wa Cyendeleele. Ne ewu udi ne Mwoyi wa Cyendeleele, udi ushaala ne mwoyi ne mmubeneshiibwe kudi Nzambi bwa kashidi.

³³⁰ “Kadi musuuka udi wenza mpekaatu, musuuka awu wôwò newu- . . .” Newènzè cinyi? [Disangisha didi dyamba ne: “Newufwe.”—Muf.] Ncya bushuwa. Nanku, kawena ne Mwoyi wa Cyendeleele to. Cya bushuwa. Ûdi ne—ùdi ne dinyooka dyàwù, kadi kí m’Mwoyi wa Cyendeleele to.

³³¹ Nenku, nudi numona’s, kucidi anu bintu byàbùngì bìdì bikengela kulongesha, netukufike matuku kumpala. Mukalenge anubeneshe.

³³² Mpindyewu twìmbààyi musambu mwîmpè wa kale ewu, pacidi mwaneetu wa bakaji wènda ùya apa. Ngeela meeji ne inàbànzà ewu mwaba ewu udi mwa . . .

³³³ Rosella, wawa ki mamwèbè anyi? [Mwaneetu wa bakaji Rosella udi wamba ne: “Eyo.”—Muf.] Mona’s, mwoyi webe ubeneshiibwe! Ndi ne disanka dya kukumona, mwaneetu wa bakaji, wenza nanku awu. Mbîmpè be.

³³⁴ Rosella Griffin, umwe wa ku balunda batekete baa pa mwoyi batudi bapete. Nnsongaakaji mutekete uvwa kanwayi wa maala a kapyà; bwa bamwe baa kunudi nwènù mwaba ewu, bàdì bafwanyine kwikala beenyi. Bwa Rosella yèyè kabyena bimutonda bwa pàndì ngamba cyòcì aci to. Pààkabàndàye pa cibumba cya ku cyambilu kwaka kù—kùvwà . . . muneemu mu Indiana. Ne nukaadiku kacya bamone mukengeledi wa luse, yèyè kadi ki uvwa umwe wa ku bôbò, kanwayi wa maala a kapyà wa mèsù makonyangale. Kwine aku, nkuvwa bangangabuka banaayi baa mu Chicago bambe ne yèyè udi . . . Ba-Alcooliques Anonymes, ne bakwabo bônso, bamane kumulekela. Kadi diloolo kampanda dyakalwaye kubwela mu disangisha, Nyuma Mwîmpè kadi kukutulula nsòmbelu wende ne kumwambilaYe anu mwaba awu. Aci kadi kukosaci bwalu’s.

³³⁵ Mutangilaayaaku mpindyewu, ngeela meeji, ne bidimu makumi asatu ne bya mu njila, mufwanyine kumweka bu udi ne bidimu dikumi ne mwandamukulu’s; nsongaakaji mutekete mulenga, mwîmpè kwîsù. Kàtukù mulabule whisky to kubangila anu piine apu; kàciyi kabidi ne dijinga dya kumunwa to. Ûkaadi ne mwoyi bwa Kilisto, wènda ùtàm bakana mu mìsèèsù, myaba yònsò, wènda ùfla bujaadiki bwa butumbi bwa Nzambi, ùfla kudi bangènzàmpèkààtù ne baakanwayi baa maala a kapyà, eku ne eku kwa myaba ya balalakanyi yònsò, ne bikwabo byònsò, mu Chicago mujima, wènda wènza cintu kampanda bwa Mukalenge.

³³⁶ Wakabatiijibwa mu Dîna dya Mukalenge Yesu, kadi mamwëndè nyewu ulwa diloolo edi bwa kwezayè pende bya mwomumwe; bu Nzambi mwa kumwondopaku, bu Yesu mwa kumwondopaku. . . “Cyònsò cinùkénjì mu mēyi anyi mu cyenzi, nùbyènzè byònsò mu Dîna dya. . .” [Disangisha didi dyamba ne: “Yesu Kilisto.”—Muf.] Aci ki cidì Bible mwambe. Ncyà bushuwa.

³³⁷ Eyo, mpindyewu tudi baswe kwenza mudimu wa dibatiiza. Netwânjì kujima myëndù bwa tusunsa tukese cyanaana patudi tudilongolola bwa mwine mudimu ewu apa, bwa kubatiijibwa, ne—ne pashiishe netutekemene cikondo cya dicyonkomoka mu Mukalenge.

³³⁸ Wèwè ki wënza mudimu wa dibatiiza diloolo edi anyi? Eyo, mbîmpè—mbîmpè udilongolole. Nenukù mēmè nēmbangè, mēmè nēndombolè misambu ne bikwabo patudi tutungunuka apa. Pacidibo benza. . . [Mwaneetu Neville udi wamba ne: “Kudiku bilàmbà lwà paanyima apa anyi, Doc?”—Muf.] Bilàmbà bya dibatiijibwa naabi, Doc, lukasa lukasa. Eyo.

³³⁹ Twĩmbààyi umwe wa ku misambu mîmpè ya kale eyi. . . [Katupa kaa mukaba wa mēyi munda mutupu—Muf.]

³⁴⁰ Nenukù too ne patwenza nanku awu, patudi tupatuka apa, tudi ne cya kwenza cinyi?

Angata Dîna dya Yesu wëndè naadi,
Tupona mikookwela ku makàsà Ende,
Mfumu wa bamfumu mu Dyulu, netuMwase
cifulu cya butumbi,
Paajika lwendu lwetu.

Eyo, tujuukilaayi kuulu.

Angata Dîna dya Yesu wëndè naadi,
Wèwè mwânà wa kanyinganyinga ne dikenga;
Nedikupe disanka ne busambi. . .

³⁴¹ Nēnnwāmbilè citwenza. Kudimuka ulabule muntu kampana mwaba awu ku cyanza, wamba ne: “Wetwawu, mwaneetu! Ncyà bushuwa ne ndi ne disanka dya kwikala neebe mu disangisha emu.”

Dîna dya mushinga mukole, Éyi dya bupole be!
. . . ne disanka dya Dyulu;
Dîna dya mushinga mukole, Dîna dya
mushinga mukole, Éyi. . .



DIMIINU DYÀ NYÓKA LUA58-0928E

(The Serpent's Seed)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, mu matuku 28 a ngondo wa citeema, cidimu cya 1958, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org